

# **Badische Landesbibliothek Karlsruhe**

**Digitale Sammlung der Badischen Landesbibliothek Karlsruhe**

**Zwo Tröstliche || Predigt/ Vber der Leich/|| D. Doct:  
Martini || Luther/ zu Eissleben den XIX.|| vnd xx. Februarij  
gethan/||**

**Jonas, Justus  
Caelius, Michael**

**Wittemberg, [1546]**

**urn:nbn:de:bsz:31-62266**



59 A 3251

RE

Beibände:

- 1) Luther / Martin / Warnunge... an seine lieben Deutschen..., 1546.
- 2) " " / Das zwelffte Capitel Danielis ..., 1546.
- 3) " " / Vier Predigten ... vor s. abchied aus dies. Leben, 1546.
- 4) Jonas / Justus / Vom christl. abchied aus dies. trötl. Leben ..., 1546.
- 5) Buzenhagen / Joh. / Eine christl. Predigt über d. Leich... M. Luthers, 1546.
- 6) Melanchthon / Ph. / Oratio Über der Leich M. Luthers ..., 1546.
- 7) Epitaphium Des Ehrwürdigen Herrn ... M. Luthers..., [1546?].
- 8) Stigelius / Johann / als wir sanct M. Lutherr ..., 1546.
- 9) Scharschmied / Franc. / Historia Vom Christl. Wandel... M. Lutheri... 1546.
- 10) Jonas / Justus / Zwei Trötl. Predigt Über d. Leich M. Luthers..., 1546.
- 11) Menius / Justus / Ein trötl. Predigt über d. Leich... Fr. Mecums, 1546.

10  
Zwo Tröstliche

Predigt/ Vber der Leich/

D. Doct: Martini

Luther/ zu Eissleben den XIX.

vnd xx. Februarij gethan /

Durch /

D. Doct: Justum Jonam.

M. Michaelem Celium. <sup>[Caellino]</sup>

ANNO 1546.

Joannis viij. Cap.

Warlich / warlich / sage ich euch / So jez  
mand mein Wort wird halten / der wird  
den Tod nicht sehen ewiglich.

AK

*[Faint, mirrored text, likely bleed-through from the reverse side of the page]*

an 59 A 3251

*[Faint, mirrored text]*

*[Faint, mirrored text]*



*[Faint, mirrored text]*

*[Faint, mirrored text]*

78



# Der erst Sermon:

D. Justi Zone / Ueber der Leich D.  
Martini Luthers / Zu Eissleben am  
xjr. Februarij gethan. Darnach zu  
Salle widerholet / Vnd durch ein  
Gottfürchtigen mit der Feder  
excipirt. Anno 1546.

i. Thess. iij.

**W**IR wollen euch aber / lie-  
ben Brüder / nicht verhal-  
ten / von denen die da sch-  
lasse / Auff das jr nicht trawrig seid /  
wie die andern / die keine Hoffnung  
haben. Denn so wir gleuben / das  
Jesus gestorben vñ aufferstandē ist /  
Also wird Gott auch / die da entsch-  
lassen sind durch Ihesum / mit jm für-  
A ij ren:

ren. Denn das sagen wir euch / als  
ein wort des HErrn / DAS wir/die  
wir leben/ vnd überbleiben in der zu-  
kunft des HErrn/ werden denen ni-  
cht vorkomen die da schlaffen. Denn  
er selbs der HERR wird mit einem  
Feldgeschrey vñ stimme des Erzen-  
gels/ vnd mit der Posaunen Gottes  
ernider komen vom Himmel / vnd die  
Todten in Christo werden aufferste-  
hen zu erst. Darnach wir/die wir le-  
ben vñ überbleiben/ werden zu gleich  
mit den selbigen hingezuckt werden  
in den Wolcken / dem HErrn entge-  
gen in der lufft / vnd werden also bey  
dem HErrn sein allzeit. So tröstet  
euch nu / mit diesen Worten vnter-  
einander.

Lieben

**L**eben freunde / wir habens Christliche vrsach / das wir diese predigt thun / vom tode vnd absterben vnsers lieben Vaters D. Martini / der da mit gantzem ernst vnd allen trewen / der gantzē Christenheit vnd allen Kirchen / gantzer deudischer Nation / auffshöchst tröstlich gewesen / Vñ euch hie zu Wallsonderlich geliebet vnd guts gegönnet / Durch welchen ein sehr gros teil in aller Welt / bekert worden ist. Heute finds sieben wochen / da der thwere Man D. Mart. Luther zu Eisleben / in seinem Vaterlande / kurtz vor drey vhr nach mitternacht / in Christo seliglich entschlaffen ist / Da ich den andern tag / nach seinem abschiede von dieser Welt / habe zu S. Andreas / in der Kirchen zu Eisleben / ein predigt gethan / als die Leich mitten in die Kirchen gesetzt / warlich mit heissen threnen / vnd darumb / auch diese itzige predigt thun / frome Christliche hertzen / dadurch zuerinnern / Was sie für ein hohen Schatz / ein zeitlang / an diesem trefflichen thworen Manne gehabt / vnd was sie an im verloren haben / Vnd ist dazumal dieselbige predigt / in drey stück geteilet.

Erstlich von der Person D. Mart. Lutheri / vnd von seinen grossen gaben / vnd hochem verstande in geistlichen hohen sachen / so  
A iij der



der thewre Man gehabt / Item / wie er sich /  
zum tode vnd schlaffe auch ein gantz jar vñ  
lenger / zuuor / tröstlich bereitet habe.

Zum andern / saget ich dazumal aus dem  
Text Pauli / Von der aufferstehung der Tod-  
ten / vnd wie wir den Man D. Lutherum / der  
vns die neun vnd zwentzig jar vber / wider die  
Teuffelische lügen des Papsst / vnd der heillosen  
Mönchen / wider das Reich des Teuffels / ge-  
schrieben / gekempffet vnd gefochten hat / wer-  
den am Jüngsten tage / gewislich wider sehen  
vnd hören / in ewiger freude vnd seligkeit.

Zum dritten / eine vermanung gethan vñ  
angezeigt / das der Tod D. Doct. Mart. Lu-  
thers / werde gewislich / wie aller Propheten  
Tod / eine sonderliche krafft vnd nachvolgend  
wirckung hinder sich haben / wider die Gottlos-  
sen / verstockten / verblendten Papissten etc.

Vom ersten stücke / Von der Person vnd  
den herrlichen gaben D. Luthers seliger / vnd  
wie er sich so fein vnd seuberlich zu sterben be-  
reitet hab / das allen Gottfürchtigen menschen  
zu wissen tröstlich ist / Wolte ich von hertzen  
wündschen / vnd were wündschens werd / das  
jr alle / die jr itzt hie in der Kirchen seid / gar  
frisch vnd newe / gelesen hettet / das erste Buch  
Mosi / das der liebe Vater D. Martinus / gar  
reichlich vnd schön / hat ausgelegt / Item / im  
newen Testament / Das 14. 15. 16. 17. cap. Jo-  
hannis

Hannis/wie ich den hoffe/das ewer viel hie sein  
die es gelesen/vnd hetten das alles in gutem  
frischem gedechtnis/So würdet jr denn erst  
recht sehen/was jr fur ein Man vnd schatz/auß  
D. Mart. Luther/verloren hettet. Item die  
Epistel zun Galatern/den Psalter/Sprüche  
Salom. Ecclesiasten/die er Verdeutschet/wel-  
che jtz kein Doctor zu Paris/Löwen/noch jr-  
gent andern berümpften orten/köndte oder ver-  
möchte (Ja wenn man alle Papisten zusamen-  
schmelzte) zu deuschen. Diese vnd ander Bü-  
cher zeigen an/was D. Mart. fur ein Man ge-  
wesen/vnd was er fur ein reichen Geist gehabt  
hat/Wie treulich vnd fleissig er in der Schrift  
hab gearbeitet/Denn würden wir sagen/was  
wir fur ein Man an jm verloren.

Von der Person/hetten wir ja viel zusagē/  
kennens nicht alles ansrichten/darumb wol-  
len wir hie geschweigen seins scharffen ingenij/  
vnd trefflichen scharffen hohen verstands/den  
der liebe vater D. Mart. Luther/seliger vñ Chri-  
stlicher gedechtnis/von seiner Jugent auff/in  
sein 18. vñ 20. jare/ gehabt. Ich hab von viel  
leuten gehört/die von jugent auff mit jm vmb-  
gangen/die bezeugten/das sie trefflicher inge-  
niums nicht gesehen noch erfahren/den in dem  
D. Mart. vnter welchen einer D. Lang vñ D.  
Staupitz zu Erford gewesen/den sie habens er-  
farē/dierweil sie teglich mit jm vmbgangē sind.//  
Item

Item / so hat auch D. Mellerstadt / der dazumal / da die Vninersitet zu Wittemberg fundirt ist wordē / Rector gewesen / gesaget / Habt mir acht auff den jungen Mönch / M. Martinum Luther / er hat so einen trefflichen scharffsinnigen verstand / dergleichen mir nicht allein lebenlang furkomen / Es wird gewis ein furtrefflicher Man aus jm werden / Wie denn auch geschehen.

So hatte auch D. Mart. Luther viel ander reiche gaben / vnd war ein trefflicher gewaltiger Redener / Item / ein vberaus gewaltiger Dolmetzcher / der gantzen Bibel / Es haben auch die Cantzleien / zum teil / von jm gelernt / recht deudsch schreiben vnd reden / Denn er hat die Deudsche sprach wider recht herfur gebracht / das man nu wider kan recht deudsch reden vnd schreiben / Wie das viel hoher leut / müssen zeugen vnd bekennen. Was aber D. Martinus / fur ein beredter Man vnd hoher schreiber gewesen sey / hat man off in geringen sachen / da er schlecht brieff geschriben / erfahren / So bezengen das gnugsam seine Bücher vnd Schrifften / der sehr viel ist / Das werck lobet den Meister. Von den selbigen natürlichen vnd hohen gaben / wil ich nichts sagen / Sondern weise alle Gotfürchtige hertzen vnd Christen in seine Bücher / Postillen vnd Comenta

mentarien etc. Da werden sie findē / das sie einen  
trefflichen Redener / Prediger vnd rechten Bis-  
choff / an dem Manne gehabt / Wolt Gott /  
Dentsch Land hetteder Leut vñ Bischoff nur  
sehr viel / man dürfft jr warlich wol.

Es ist auch in dem D. Martino Luthero  
ein reiche gnad / vñ grosses Liecht des heil-  
gen Geistes / gewesen / rechte ware erkenntnis  
Gottes vnd Christi / Welchs er nicht gerin-  
gert / sondern gemehret hat / durch tegliche  
vleißige arbeit in der heiligen Göttlichen Sch-  
riffte / mit studiren vnd lesen der selbigen / viertzig  
gantzer jar durch / Also / das im die heilige  
Schriftte durchaus / wol bekant war / Er hat  
gar viel / viel mal / die Bibel ausgelesen / das  
sie im ist leufftig gewesen. Das hat er ange-  
trieben von seinem 24. jar an / bis in sein 63. jar /  
bis er gestorben / der hohe tewre Man.

Ich mus hie zwey sonderliche wort ge-  
dencken / welche sein hertze anzeigen / Wie  
Christus sagt / Wes das hertz vol ist / gehet  
der mund vber / Das erste / das er gesaget /  
Ich wolte von hertzen / das ich den ersten Ar-  
tikel vnser Christlichen Glaubens / von der  
Schöpffung etwas verstünde / Ich gienb  
an Gott Vater / Schöpffer Himels vnd der  
Erden. Aber ich wil gern in dem Artickel /  
B ein

ein A b c Schüler bleiben / vnd halte es dafür /  
das den Artickel wenig leut / auch der Dohen /  
verstanden haben / Es wer denn Adam /  
Noah / Abraham / David. Aber Esaias / Jere-  
mias vnd andere Patriarchen vnd Propheten /  
die haben auch etwas dauon verstanden / ha-  
ben aber alle also daran studirt / das sie sich  
Schüler bekennen.

Das ander wort ist das / das er sagt / Er  
wolt / das der Artickel von der Erlösung ( das  
Gott seinen Son in die Welt gesand hat / zur er-  
lösung des gantzen menschlichen Geschlechts )  
die höchste Theologia geacht würde / wie den  
selbigen Paulns achtet / vnd alle Aposteln. Er  
hat wol gesehen vnd verstanden / wie ein hoher  
trefflicher Artickel das ist / Gott hat sein Son  
in die Welt gesand / das man an dem Artickel /  
so lange man lebet / gnugsam zu studiren vnd zu  
lernen habe / vnd doch nicht werde auslernen /  
Wiewol / den / viel berühmte Theologische  
Schulen / als Paris / Cöln / am wenigsten ge-  
trieben / sonder menschen tand / wider diesen  
Artickel geleret / Dauon anderzeit weiter .

Wolan / Wir wollen nu hie von reden /  
wie sich D. Mart. Luther / ein gantz jar / vor  
seinem ende / zum tode bereitet vnd geschickt  
hat. Da er nu in sein 63 jar kam / da sagt er offft  
solche

solche hohe vnd tewre wort / die wol hetten  
mügen verglichen werden / den predigten vnd  
worten Noe / als / der auch zu einer sehr bösen  
zeit gelebet / vnd saget mit schmerzen / Ach die  
Welt / die hat die lügen lieb / als des Paps /  
Mönchen / vnd ander menschen Fabeln / vnd  
bey dem grossen hellen Liecht des Euangeli /  
ist die Welt dahin geraten / das itzund bey  
vielen forthin nicht mehr gemeine sünde / oder  
gebreechen funden werden / Sonder eitel Gotts  
lesterung / Mißbreuch / Trotz / vnd wissent-  
lich verharrung in groben lastern / Niemand  
wil mehr ein Sünder sein / niemand wil sich  
vor Gott demütigen / Da wird gewisse straffe  
folgen.

Das ist nu auch ein besonder gnad / vnd  
erkenntnis Gottes / von dem Manne gewesen /  
das er sich zum abscheid vnd tode bereitet hat /  
ein gantz jar zunor / Datt in sein Psalterium  
vnd Betbüchlin / das er stets mit sich geno-  
men / vber zwentzig Trostsprüche geschrie-  
ben / der meinung / als wolt er sagen / Ich wil  
dermal eins / mit Gottes hülff / in meiner letzten  
Todstunde / der Sprüche einen ergreifen / vnd  
damit wider den Satan / vnd alle pforten der  
Helle gerüst sein. Vnd zeigen nu diese Sprü-  
che / in sein Betbüchlin geschrieben / an / das  
diser Man nicht schlecht ein Lehriunger / Son  
B 4 dern

bern in der geistlichen Kempffen / ein furtreff-  
licher Meister gewesen.

Der erst Spruch ist / so er im zum schatz  
vnd trost auffgeschriben hatt / 1. Petri 5. Al-  
le ewre sorge / werffet auff in / Er sorget fur  
euch / Als wolt er sagen / Samlet alle ewre sor-  
ge vnd anligen / auff ein bündtlin / fasset die al-  
ler grössste sorge auff ein klewen (Wie den das  
Griechisch wörtl<sup>in</sup> ἐπιβάρυντες, solches fein mit  
sich bringt) vnd werffet die auff in / vberant-  
wortet sie Christo / der sorget fur euch. Dem  
edelen vnd tröstlichen Spruch nach / hat der  
frome tewre Man D. Doct. Martinus / alle  
seine sorge auch auff den Herrn Christum ge-  
worffen / inn seiner Todsstunde / vnd nicht ge-  
fraget noch gesorget / wo er bleiben werde /  
Sondern hat Gott sorgen lassen fur seine See-  
le / die er im beuohlen / wie er die werde versor-  
gen vnd erhalten. Denn alle Menschen haben  
die sorge / wenn sie sterben / wo sie bleiben sol-  
len / Aber hie hören wir / wie Gott die zeit vn-  
sers gantzen lebens / fur vns sorget / darzu auch  
in höchsten vñ grösten nöten / Nemlich / in der  
todsstunde / vnd letzten zügen. Den Spruch  
Petri / hette ich warlich nicht auff die letzte  
Todsstunde also können tröstlich brauchen.  
Da sihet man / was D. Martinus fur ein Man  
gewesen / vnd wie vleissig er / der Apostel wort  
berwogen. Item

Item / So hatt auch der liebe Vater / vber  
den spruch diese gedancken / Unser lieber trewer  
er Gott / der mich in das hohe Predigampt  
gesetzt hat / der wird gewis fur mich sorgen vñ  
meine Seele wolerhalten / Ich wil nur getroßt  
vnd frölich / meinen Geist / in seine Hande be-  
fehlen / Denn der Herr wird wol wissen / wo  
meine Seele bleiben sol / der sie so geliebet / vnd  
fur sie gesorget hat / das er sein leben / ja sein ei-  
gen Seel dahin gegeben / das er meine Seele  
erlöset / Der ist der edelste vnd bestehirt vnd  
Bischoff / aller Seelen so in ihn glauben / Ge-  
lobet in ewigkeit / So hebt er nicht an mir an  
zu lernen / wie er die Christglaubigen seelen ver-  
sorgen sol / Ich weis / ich werd nicht der erste  
sein / an dem Gott lerne wird / wie er die See-  
len der Christglaubigen bewaren vnd erhalten  
sol. Sanct Lorentz / der hat Christo seine See-  
le / auff dem glüenden Rost benohlen / vnd ge-  
sagt / Christus hat fur sie gesorget / der wird  
sie wol erhalten. Desgleichen hat S. Ste-  
phan Act. 7. Christo seine Seele / mitten vn-  
ter den Steinen benohlen / vnd sprach / Herr  
Jhesu / nim meinen Geist auff / vnd sie ist von  
ihm auffgenommen / vnd erhalten zum ewigen le-  
ben. Vnd andere Werterer mehr / das ich also  
nicht der erste bin / der sich Christo befolhet /  
vnd des Seele erhalten wird / Ich wolte nicht  
gerne (hat er offft gesaget) das meine Seele in

B ij meiner



BLB

Badische Landesbibliothek  
Karlsruhe



meiner hand stünde / Denn wenn sie in meiner  
hand stünde / hette sie der Teuffel langst / ja  
wol in einem augenblick / wie ein Geier ein jung  
Dünlin oder ein Vogel / weggerissen / Aber  
aus der Hand Christi / dem ich meine Seele  
befohlen habe / wird sie weder Teuffel noch  
jemand reissen / Denn Christus sagt Joan. 10.  
Die Schaff die meine stimme hören / vñ fol-  
gen mir / die wird niemand aus meins Vaters /  
oder meiner Hand / reissen.

Also hat auch der liebe Vater den Spruch  
S. Ambrosij / in sein Psalterlin geschrieben /  
da er zu seinen Brüdern also gesaget / Ich hof-  
fe nicht / das ich also bey euch gelebet / das ich  
mich schewet lenger vnter euch zu leben / denn  
wir haben ein guten vnd trewen Herrn / So  
weis ich auch keinen Freund / der mehr für  
mich gesorget hett / denn der **WELK** / Da-  
rumb / So schewe ich auch mich nicht zu ster-  
ben. Mit diesem spruch S. Ambrosij / hat er /  
der liebe D. Lutherns wöllen anzeigen / das er  
sich auch nicht schewe hie lenger zu leben / denn  
er habe hie also in der Welt gelebet / das er sich  
seines lebens vnd wandels / nicht dürffe sche-  
men / So schewet er sich auch gar nicht zu ster-  
ben / wenn es Gottes wille were / denn er weis  
das jm die Berberg im Dimel / durch Chri-  
stum / erworben vnd bestellet sey.

Ferner

Ferner / hat er auch in sein Psalterlin geschrieben / eines sehr geistlichen Bischoffs / wort / der wol dem Ambrosio gleichen möcht / dem der Welt bosheit sehr wehe gethan / vnd hat sie nicht können leiden 2c. Dem hat Christus die antwort geben / in seiner letzten Todtsstunde / vnd gesaget / Du heulest vnd weifest / hat es denn die Welt so gut mit dir gemacht / das du sie vngern lessdest? du wilt der Welt bosheit nicht leiden / vnd du wilt doch nicht aus der Welt scheiden. Den Spruch wird D. Luther / nicht vmb sonst geschrieben haben. Ach wie viel Trübsal vnd Creutz / hat er von seinen Feinden gehabt / ja es hat jm von hertzen weh gethan / das die Welt so Gottlos lebet / im Geitz / Wucher / verachtung vnd vndanckbarkeit des Worts / in neid / hass vnd Satanischer giffte der Papisten / ersoffen / Item / das auch soniel falscher Brüder worden / die von der reinen Lehr / abgefallen / Darumb so hat er hiez mit wollen zeugen / er wolle gerne sterben / vnd sich ins Grab legen.

Item / Den Spruch hat er geliebet / was schewest du dich für Christo / bey jm zu sein / der dir doch die höchste trew bewiesen vnd erzeigt hat / Nemlich / seine Seele für dich gegeben zu einer erlösung / vnd für dich gestorben ist / Meinst du der Teuffel oder die Welt werde  
das

das fur dich thun / das Christus gethan ?  
Womit beweiset die Welt solche trewe ? Das  
thut sie nicht / was begerest du denn hie zu sein ?  
Sie hat nicht iren Leib vnd Seele / fur dich ge-  
geben / Sondern Gottes Son / Ihesus Chris-  
tus . So kanstu je nu / an keinen ort komen vnd  
sein / da du besser bist / denn bey Christo dem  
Derrn / Gottes Son / der fur dich gelitten /  
gestorben 2c. D wie ein schöner vnd trefflicher  
Spruch ist das / wol werd / vleissig zu mercken.

Mehr / ist dieser Spruch auch in seinem  
Betbüchlin gestanden. Matthei 19. stehet ge-  
schrieben / Wiltu zum leben eingehen / so halt  
die Gebot Gottes / das ist ( stirbe ) Denn es ist  
beschlossen / das alle Menschen sterben sollen  
vñ müssen / derwegen wilt du dich nach diesem  
Spruch halten / vnd zum leben eingehen / so  
stirb / so hastu das Gebot Gottes gehalten / vñ  
wirst leben / Denn dis leben / ist ein leben der  
Sünde / vñ straffe auff die Sünde geworffen /  
So hören wir nicht auff zu sündigen / bis wir  
sterben. Wer nu Christlich vnd wol gestorben  
ist / der ist der sünden los / vnd darff sich vor  
der straff nicht mehr furchten / Sondern ist al-  
les jamers / trübsals vnd elendes dieses vergeng-  
lichen lebens / gefreiet vnd ledig / Also ist nu der  
Spruch auch fein angelegt / vnd wolgeredt.  
Wer wolt doch den Spruch dahin so meister-  
lich

lich gedentet haben / Das die Gebot Gottes  
halten / hiesse / Sterben ?

Derwegen aus diesen vnd andern / viel  
Trostsprüchen mehr / so er geschrieben / ist wol  
zu mercken / wie ein hoher trefflicher vñ Geist-  
reicher Man / der liebe Vater D. Martinus sey  
gewesen / der sich ein gantz jar vnd lenger / zum  
Tode bereitet vnd gerüstet hat / als hette er dar-  
mit angezeigt / Ich wil hinweg / Wil die Ge-  
bot Gottes halten / wandern von diesem leben  
vnd bösen Welt / inn ein besser vnd ander leben  
vñ Welt ꝛc. Darumb sagte er auch den abend  
zunor / auff den Mitwoch ( ehe er vorschied )  
Wenn ich meine liebe Landsheerrn / die Grauen  
zu Mansfeld vertragen habe hie zu Eiseben /  
So wil ich heim ziehen / vnd mich in meinen  
Sargt legen / vnd den Würmen meinen Leib  
zu essen geben. Diese wort zeigen an / das  
er mit dem Tode vnd todsstunde sey vmbgan-  
gen / das er auch den abscheid von diesem leben  
nicht geschewhet. Diese Sprüche alle / geben  
gnug zunerstehen / wie ein reichen / hohen gros-  
sen Gottes Geist / der Man gehabt hat / vnd  
ist ein gar tewrer Man gewesen / desgleichen  
die Welt inn langer zeit nicht gehabt / Dis hab  
ich kurtz vom ersten stück / von der Person D.  
Martini geredt. Wollen nu das ander stück  
anch handlen.

C Dvs

Das ander stück dieser Predigt / ist von  
der aufferstehung der Todten / da wir vnsern  
lieben Vater den ehrwürdigen herrn D. Marti-  
num Lutherum / der nu von vns aus der welt/  
abgescheiden / vnd am Jüngsten tage wider  
sehen werden / Den S. Paulus sagt zun Ehes-  
salo klar / das Christus die / so in jm entschlas-  
ffen sind / mit jm süren werde. Der wort trö-  
stet sich ein Christ / wer sich der wort nicht trö-  
stet / der gedencke nur nicht / das er ein Christ  
sey / Den das ist so ein reicher tröstlicher Text /  
den man mit keinem Gold bezalen kan / Daran  
helt sich ein Christ / setzet seinen trost auff die  
wort Pauli / vñ glenbt festiglich / er werde wider  
auffstehen am Jüngsten tage mit allen Chri-  
sten. Ein Gottlos mensch / ein Epicureische  
Saw / setzet seinen trost auff die wort Pauli  
nicht / Sondern auff gelt vnd gut / auff sei-  
nen wucher / geitz etc. Denn er weis / noch  
glenbt nicht / das er wider werde auffstehen  
am Jüngsten tage / vnd die / welche zuuor / mit  
vnd nach jm gelebet haben / werde wider ses-  
hen etc. Paulus aber saget / DER HERR  
VVIRD MIT EINEM FELDGESCHREY  
KOMEN etc. Der Herr ist gros / so mus auch  
sein Triumph vnd Herrligkeit gros sein / Aber  
nach den worten / fraget ein Epicurer (wie jzt  
gesagt) nichts / er nimpt sich ihrer auch nicht  
an / Einem Christlichen hertzen aber / sind es  
eitel.

eitel Perlen vnd köstliche Kleinod / So heilt  
auch Paulus diese wort / für ein sonderlich vnd  
hohes geheimnis / das er hie den Christen (da  
die Welt gar nichts von weis) von der der auff-  
erstehung der Todten saget / vnd spricht /

**So tröstet euch nu / mit diesen  
worten vnternander.**

Als wolt er sagen / Sibe / Ich wil euch  
ein Dimlich geheimnis offenbaren / nemlich /  
Das die Welt vnd alle Menschen die jr hie se-  
het / jung vnd alt / arm vnd reich / werden hi-  
nunter müssen / inn die Erden / Das ist ster-  
ben vnd begraben werdet / beide / Christen  
vnd Vchristen / vnd endlich widderumb am  
Jüngsten tage mit ihren Leiben / Fleisch vnd  
Blut ( vnangesehen das sie inn der Erden von  
Würmen gefressen / erstincken vnd verfaulen )  
aufferstehen werden inn grosser Derrligkeit /  
Wie Paulus 1. Corint. am 15. das auch bezeug-  
et / Es wird geseet verweslich / vnd wird  
aufferstehen vnuerweslich / Es wird geseet in  
vnehre / vnd wird aufferstehen in Derrligkeit.

Drümb / wenn vns gleich ein guter freund  
stirbt / sollen wir den trost habē / wir werden in  
am Jüngsten tage wider sehen / Also tröstet sich  
Paulus / ob er wol zu Rom von dem blutdürstigen

C ij gen

gen Tyrannen Nerone / erwürget / vnd vmb  
bracht werde / so werde er doch sampt allen  
menschē / am Jüngsten tage wider auffstehē  
hen / Item / also auch alle kinder die geborn  
sind / vnd noch geborn werden (denn dis  
leben heist geborn werden / leben vnd sterben)  
werden mit iren leiben auffstehen / Denn  
wird ein frölicher seliger Tag komen / ja der tag  
der Erlösung / Wie in Christus nennet im E-  
uangelio / Luce 21. nach den vicissitudinib. vite  
et mortis / wird der fröliche tag komen / Vnd  
an dem tage wird man nicht mehr freien / noch  
sich freien lassen / nicht mehr kinder zeugen /  
Da wird man nicht mehr lahm / blind vnd  
franck sein / Item / nicht mehr sterbē / Es wird  
da auffhören die sterblichkeit / vnd angehen ein  
vnsterblich ewiges leben.

So saget nu Sanct Paulus weiter /  
Der HERR wird mit einem  
Feldgeschrey / vnd stimme des Erz-  
engels / vnd mit der Posaunen Got-  
tes ernider komen vom Himmel / vnd  
die Todten in Christo werden auff-  
erstehen zu erst / Darnach wir / die  
wir leben vnd vberbleiben etc.

Dis

Dies ist ein schöner goldener Text vnd  
trost / für die Christen / den wir all vnser leben  
lang behalten / vnd vns damit trösten sollen / das  
von hie S. Paulus saget / Nemlich / das der  
Herr wird mit ein Feldgeschrey komen / vnd  
das wir werden auffstehen / vnd ewiglich bey  
dem Herrn sein / dauon die Welt nichts weis /  
Sie tröstet noch frewet sich auch dieses Text  
nichts / alleine ihrer Thaler / gelds vnd guts etc.  
Vnd wil nu S. Paulus hiemit so viel sagen / Ir  
lieben Christen / Wenn jr mich schon verkeret /  
der ich ewer Bischoffe / Prediger / Seelsorger  
vnd Hirt in Christo bin / dennoch werde ich wi-  
der auffstehen / vnd ench als meine Pfarrkin-  
der / inn jener Welt widerumb gewis sehen /  
des gleichen jr mich / in ewigkeit.

Das er nu sagt / Christus werde mit einem  
Feldgeschrey komen. Das Feldgeschrey wird  
gros sein / das mit der Posaunen des Lrtzengels  
Gottes geschehen wird / dauon auch die Todten  
werden erwachen / Vnd am ersten / die / so inn  
Christo / im rechten reinen glauben entschlaffen  
sind / werden auffstehen / vor vnd erst vnd dar-  
nach mit denen so noch leben / Christo inn die  
Lufft entgegen gezogen werden / wie auch Chri-  
stus sagt / Johan. 5. Warlich / Warlich ich sage  
euch / Es kompt die stunde / in welcher / alle die in  
C iij den



den Grebern sind / werden seine stime hören / vnd  
werden herfür gehen / die da guts gethan ha-  
ben / zur aufferstehung des lebens / die aber vbel  
gethan haben / zur aufferstehung des Verich-  
tes / Zugleich nu mit denen / wird vnser lieber  
Vater D. Martinus Luther / Christlicher ge-  
dechnis / auch aufferstehen / mit dem leibe / an-  
gesichte / henden / füßen / die er gehabt / vnd wie  
wir hie gesehen haben / mit dem seligen munde /  
da er nu xxix. gantzer Jar Deudschem Lande /  
Gottes wort / rein geprediget hat / doch mit ein  
hellen clarificirten Leibe / der da wird leuchten  
wie die Sonne / davon Christus sagt / Matthei  
13. vnd Daniel der Prophet am 12. Capitel / Die  
Lerer werden leuchten wie des Nimels glantz /  
vnd die / so viel zur gerechtigkeit weisen / wie die  
sternen immer vnd ewiglich. Weil nu D. Mar-  
tinus ein grosser Lerer gewesen / vnd ihr viel /  
viel / zur gerechtigkeit gewiesen / wird er auch  
ein schönen hellen glantz / für andern haben /  
wie wirs Job Gott wil / sehen werden.

Job am 19. Capit. sagt von der Außer-  
stehung also / Ich weis / das mein Erlöser lebet /  
vnd er wird mich hernach aus der erden auf-  
ferwecken / vnd werde darnach / mit dieser mei-  
ner haut vmbgeben werden / vnd werde inn  
meinem fleisch Gott schawen. Solches nu  
zu wissen / ist ein grosser trost für die Christen /  
das sie werden mit ihren leiben widder aufer-  
stehen /

sehen / vnd inn ihrem fleisch Gott schawen.  
Da redet Job gantz vnd gar dasselbige / was  
Paulus hie sagt / Inn der selben Auferstehung  
am Jüngsten tage / werden wir sehen / den ho-  
hen tewren Man / den wir jetzt verloren haben /  
D. Luther / ja nicht alleine sehen / sondern er  
wird auch wider mit vns / die er hie inn der  
Welt gekand / den er geprediget / die er durch  
das wort Gottes bekeret hat / freundlich reden /  
nicht allein mit vns / sondern mit den gantzen  
Dimlischen Heerscharen / der lieben Patriar-  
chen vnd Propheten / von den harten Kempf-  
fen vnd streiten / widder das Reich des leidli-  
gen Teuffels / welcher er hie inn der Welt viel  
gehabt / von den grossen vnd hohen Tenta-  
tionib. so er die 29. Jar durch / vom Teuffel  
erlitten / vnd ausgestanden hat. Denn D.  
Martinus Luther / hat viel harter Kempffe ge-  
habt mit dem Teuffel / furnemlich inn gros-  
sen hendeln / als in Carolstadts / Item vber den  
grossen wichtigen hendeln / zu Augspurg auff  
dem Reichstage / Item vber der grossen sache  
des Sacraments / der Widerteuffer / Antino-  
mer / vnd anderer etc. Das auch D. Martinus  
selbst offe gesagt hat / Was ich vmb der lere des  
lieben Euangeliij willen / die Gott jetzt widerumb  
der Welt hat offenbaret / leide vnd erlitten ha-  
be / das sol kein Mensch von mir / hie inn dies-  
er Welt / erfahren / aber an jenem tage wirds  
offenbar.



**BLB**

Badische Landesbibliothek  
Karlsruhe

offenbar werden. Na am Jüngsten tage wird  
ers vns sagen / vnd wir werdens hören / was er  
hie inn dieser Welt keinem Menschen hat wöl-  
len sagen noch offenbaren / von der grossen Vi-  
ctorien des Sons Gottes / so er durch ihn ans-  
gericht / wider die Sünde / Teuffel / Papisten /  
falsche Brüder etc. Das wird er vns alles mit  
einander sagen was er auch fur herrliche offen-  
barung gehabt / da er angefangen hat / das Eu-  
angelium zu predigen / das wir vns werden drü-  
ber verwundern / vnd Gott loben fur solche Vi-  
ctorien / so er erhalten / wie auch der 34. Psalm  
sagt / Sie erhalten einen sieg nach dem andern.  
Aber dauon weis kein Satanischer Mönch /  
oder ander halsstarriger Papist / nicht ein wort /  
Vnd ob sie es schon lesen in der Schrifft / gleu-  
ben sie es doch nicht.

Vnd wird nu die Auferstehung der Tod-  
ten schnelle zugehen / Die entschlaffenen in Chri-  
sto / zu erst / Darnach die so noch leben / werden  
dem D<sup>er</sup>rn inn den Wolcken entgegen gezuckt  
vnd genommen werden / vnd also bey dem D<sup>er</sup>rn  
allezeit sein. Ah wolt Gott / solcher Tag des  
D<sup>er</sup>rn keine nur balde / vnd geschehe / das  
wir dem D<sup>er</sup>rn entgegen gezucket vnd geno-  
men würden / ehe wir vns zu Tisch setzten / vnd  
erlösete vns doch von dem jamer vnd elende / so  
wir hie inn dieser bösen Welt leiden müssen /  
vnd

vnd mechte der grossen vntrew der Welt / Item  
des vnsetzigen wuchers / geitzes / neides / affters  
redens / prachts / hochmuts vnd anderer laster /  
Item auch der greulichen Gottslesterung vnd  
schmebung / verfolgung / mords vnd blutner  
glessung / Abgötterey der verzweiffelten Gott  
losen Papisten / Pfaffen / Mönche / Nonnen etc.  
ein ende / Ste machens ja zu viel / vnd zu grob.

Vmb solchen seligen Tag / sollen wir stets  
bitten / Ah wie wird der Jüngste Tag / so ein se  
liger tröstlicher vnd frölicher tag sein / Da wird  
jederman den andern kennen / besser denn hie inn  
diesem elenden leben / das Weib den Man / der  
Man das Weib / die Kinder die Eltern / die Pres  
diger ihre Zuhörer / Vnd werden also on vnter  
las mit einander reden / bey einander sein / mit  
einander Gott loben vnd preisen / inn dem gross  
en general Synodo / inn der ewigen Kirchen /  
samt den lieben Engeln / immer vnd ewig  
lich.

Das nun ( sagt S. Paulus ) werdet ihr  
Thessalo. schwerlich vnd schwewlich glauben /  
denn es ist ein hoher Artickel des Glaubens / das  
wir verfaulten / verbrenten etc. werden widder  
aufferstehen / einander kennen / mit einan  
der reden / vnd ewiglich Gott loben. An dem  
Artickel / ergert vnd stoffet sich die vernunfft /

Denn

denn sie kans nicht begreiffen / wie doch der leb-  
den die würme fressen / item / durchs feur zu  
zu puluer vnd aschen gemacht wird / sol wider  
rumb auffstehen / vnd lebendig werden /  
Wess man nu von dem Artickel / von der auff-  
stehung der Todten / prediget / so verlacht es die  
Welt / helts nur für ein Narren theiding / wie wir  
sehen / Acto. 16. Da Paulus zu Athen von dem  
Artickel der Auffstehung der Todten predi-  
get / siengen etliche an zu sagen / Was wil der  
Lotterbube sagen? Item / da Paulus für dem  
Könige Agrippa / von der auffstehung der  
Todten prediget / sprach Festus mit lanter  
stimme / Paule / Du rasest / Die grosse kunst  
machet dich rasend / Acto. 26.

Da siehet man / was die Welt von dem  
Artickel helt / lanter nichts / Weist des Artickels  
prediger / Lotterbuben vnd thörichte leut / wie  
der Papst zu Rom / die Bischoffe vnd Cardia-  
nel vns Deudschen auch Narren / vnd thörich-  
te leut heissen / das wir predigen / gleuben / vnd  
für gewis halten / wir werden mit vnsern lei-  
ben auffstehen am Jüngsten Tage / vnd  
Gott schauen etc.

Das geheimnis von der auffstehung der  
Todten / hat vns vnser lieber trewer Gott offen-  
baret /

baret / durch sein heiliges Göttliches Wort  
vnd Euangelium / welches geheimnis die  
Welt verlachet / Aber die rechte ware Kirche /  
vnd arme Christenheit / hat hieran einen ewi- =  
gen lebendigen trost. An das offenbarte ge-  
heimnis / solte ein Christ alle morgen / wenn er  
auffstünde gedencken / vnd bey sich also sagen /  
Wolan / ich weis / das ein Tag komen wird /  
an welchem GOTTE / alle entschlaffenen inn  
CHRISTO / wird widder aufferwecken / vnd  
das alle vnser Leib / werden aufferstehen /  
die wir guts gethan / vnd an CHRISTUM  
geglaubt haben / zum ewigen / vnvergenga-  
lichen leben etc. Also solt ein Christ  
immer gedencken / vnd bey sich selbst reden /  
von dem seligen Tage / vnd zukunfft Christi /  
so würde er inn allerley leiden / Creutz vnd an-  
fechtung / gedültiger sein.

Die verstockten / blinden / elenden Papie- =  
sten / haben danon nicht ein einigen gedancken /  
ja sie lestern / verfolgen das Weilige Euan-  
gelium / das vns das grosse geheimnis / von der  
aufferstehung der Todten / offenbaret vnd anzei-  
get / darau vnser seelen seligkeit gelegen ist / denn  
wer den Artikel von der aufferstehung der Tod-  
ten nicht glaubet / der höret vergeblich predigt /  
glaubet vmb sonst / bleibet inn sünden / vnd

D 4 15

ist verlorn / wie denn Paulus sagt. 1. Corin. 15.)  
Mit solchen leuten / die das Euangelium le-  
stern / nicht annemen / hören noch glauben wöl-  
len / sol man nichts zu schicken noch zu schaffen  
haben / sol sie fliehen vnd meiden / als den Teuf-  
fel selbs / Denn ein verstockter / verharter Papist  
ist der Teuffel selbst / Sie haben keinen glau-  
ben / vnd glauben zum fenster ein / vnd zur thür  
wider hinaus.

So wil nu S. Paul / den Thessalonicern  
mit den worten so viel sagen / Ich habe euch  
gelert von dem Geheimnis / wie es werde am  
Jüngsten Tage zugehen / mit der aufferste-  
hung der Todten / Aber ich Paulus / der ich  
ench solches fleissig / aus Gottes Wort vnd  
Geist / habe angezeigt / werde nicht ewig hie blei-  
ben / vnd ewer Prediger sein / Der Nero wird  
eine kunst darfür können / vnd mich lassen umb  
bringen / das ich werde müssen auffhören zu  
predigen / Wolan / ob mich schon die Welt /  
aus grossen grim wird tödten / dennoch wer-  
de ich widder aufferstehen am Jüngsten tage  
mit euch allen / vnd ihr mit mir / Solches ha-  
ben sich die Thessalonicer mit S. Paulo  
getröstet vnd gefrewet. Des hat sich vns-  
er lieber Vater Doctor Martinus Luther /  
Deutsches Landes Prophet vnd prediger / ge-  
tröstet

tröstet vnd gefrewet / vnd die gedancken / wie  
Paulus / gehabt / das / ob er wol sterben vnd be-  
graben werde / vnd von vns / als seinen lieben  
Pfarrkindern vnd zuhörern / werde hinweg ge-  
rissen / in ein ander vnd besser leben / so werde er  
doch am Jüngsten Tage wider auffstehen /  
vnd in ewiger freude vns alle ewiglich sehen .  
Des sollen wir vns auch trösten vnd frewen /  
das wir den lieben Vater vnd Prediger / wer-  
den im künfftigen ewigen leben / widerumb  
sehen vnd hören / Dazu helff vns allen Gott /  
durch Christum / Amen. Das sey vom  
andern stück auff dis mal gnug gesaget.

Zum dritten / Sollen wir inn dieser pre-  
digt / das mercken / Das der Tod / des hohen  
Propheten D. Martini / wird gewisslich et-  
was grosses hinder sich haben / Denn ehe zwey  
jar weg komen / werden wirs wol erfaren / vnd  
vor andern Papisten / Chumberrn / Pfaffen /  
Mönch / vnd Nonnen / welche ob sie sich wol  
des todes vnd absterbens D. Martini Lutheri  
frewen / so wird er doch grosse krafft hinder-  
sich lassen / Sie werden nach etlichen jaren /  
wündschen / das D. Luther noch lebete / dem  
wolten sie nu gerne gehorchen / Vnd würden  
ihn / wenn sie köndten / wider aus der Erden  
graben / Aber es wird zu lange geharret sein /  
D in Wenn



Wenn sie zu seiner zeit / bey seinem leben / sel-  
ner warnung vnd trewen Rahts gevolget het-  
ten / Das were jnen nützlich / vnd gut / an leib  
vnd seele.

Wir lesen in der heiligen Schrifft vnd  
Cronicken / das je vnd je / wenn die zeit böß / ge-  
schwind / sehrlich / vnd am ergesten gewesen  
sind / da haben auch die hoheste vnd gröste  
Propheten vnd Gottes Menner gelebt / Als /  
vor der der Sündflut / Noah / vor der anzün-  
dung vnd verterbung Sodome vnd Gomorre /  
Loth / Vernach Elias / Eliseus etc. Aber  
bald nach eines jeden hohen Propheten vnd  
thewren Mans tod / hat allezeit ein grosse greu-  
liche straffe gevolget. So lesen wir auch im  
Buch der Richter / Da Gideon starb / wur-  
den die Jüden Gottlos / Wie geschrieben ste-  
het im buch der Richter am achten Cap. Da  
Gideon gestorben war / kereten sich die kinder  
Israel vmb / hureten dem Baalim nach / vnd  
machten Baal zum Gott / Richten Abgötti-  
sche Baalitische Gottesdienst auff / Da folgete  
auch balde Gottes straffe vnd Rute. Also wird  
gewislich auch / nach des Mannes D. Marti-  
ni tode / ein greuliche straff folgen / vber Dend-  
sch Land / wo es sich nicht bessert / vñ das sur-  
nemlich / vber die Gottlosen verstockten / ver-  
zweiffelten Papisten / Mönche / Pfaffen / vnd  
Nonnen zunor an / on allen zweiffel.

Die

Die Historia von S. Augustino zeigt an,  
das er 70. jar alt gewesen sey / gar nahe / zehen  
jar elter worden / denn D. Mart. Luther / Ist  
viertzig jar in seinem Predigamt gewesen / das  
er also / auch zehen jar lenger / denn D. Luther  
geprediget hat / Da er nu dem Tod nahe war  
vnd sterben solt / hat er gesehen / das sein Va-  
terland Affrica / solt not leiden / vnd würde im  
vbel gehen / welchs in sehr gesamert / wie wir  
itzt möchten sehen / das es Deudschem Lan-  
de / nach solchem hellen Liecht / werde vbel  
gehen / Vnd ob wol S. Augustin gesor-  
get / sein Vaterland werde nach sein tode / das  
Euangelion verlieren / dennoch hats Gott als  
so geschickt / das noch zwey hundert jar her-  
nach / das reine Wort Gottes in Affrica ges-  
predigt ist worden / Aber das ist durchs Gebet  
geschehen vnd erlanget. Dieweil dann  
wir dis itzt auch zubeforgen / wir möchten das  
Wort verlieren / so last vns auch anfahen bus-  
fertig zu leben / vñ mit ernst zu beten / Gott wolt  
sein Wort noch lenger erhalten / nach dem tode  
D. Mart. Luthers / wie er zur zeit S. Augustins  
gethan hat. Das gebe der barmhertzige Gott /  
durch Christum vnsern Herrn / Amen.

O wie oft hat der liebe Vater Doct.  
Mart. Luther / gar ernstlich Deudsch Land  
zur Buss vermanet / vnd inen gedrewet /  
als

als in der Wauspostil / vber das Euangelium  
von der zerstörung Jerusalem Luc. 19. Item/  
im 110. Psalm. im buch an die geistliche zu Aug-  
spurg / item / in der Vermanung an seine lieben  
Deutschen / wo sie sich nicht werden bessern/  
vnd die Abgötterey abthun / vnd die Abgötti-  
schen Leute meiden ( wie er denn auch hiezu  
Dall gepredigt / trewlich vnd mit ernst gewar-  
net ) man solt die Gottlose / Papistische Mön-  
chen / Nonnen vnd ires gleichen / leute / meiden  
vnd fliehen / mit inen nichts zuthun haben /  
Oder Gott werde sie heimsuchen / straffen /  
vnd das Wort wider hinweg / gantz vnd gar  
nemen / vnd widerumb schreckliche irthumb /  
wie zuuor senden. In solche warnung des theu-  
ren Mans vnd Propheten / solt man zu hertzen  
nemen / vnd die Abgötterey abthun / vnd den  
alten Sawrtzig / ansfegen / vnd sich der Pa-  
pisten Abgötterey vnd Sünde / nicht teilhaff-  
tig machen / auff das man das Wort nicht  
wider verliere. Vor andern aber sollen sich die  
Papisten furnemlich hütten / als denen solche  
drewung / wo sie sich nicht bessern / heimko-  
men werden. Johannes Duss hat Prophe-  
ceiet / ehe man in verbrand / das nach in ein  
Schwan komen werde / vber hundert jar / den  
werden sie haben müssen / vnd doch nicht bra-  
ten / Der Man ist nu vnser lieber vater D. Mar-  
tinus Luther gewesen / der hat geprediget /  
dem

dem Papst/ Bischoffen/ Cardineln/ Pfaffen/  
Mönchen etc. vnd aller Welt/ die warheit dür-  
re heraus gesagt/ niemand gefürchtet noch ge-  
schewet/ den haben sie nicht mögen braten/  
oder vmbbringen/ wie sie wol offt im sin ge-  
habt/ vnd hertzlich gerne gethan hetten/ Aber  
es hat in gefeilet/ Er ist in seinem lieben Vater-  
lande zu Eisleben/ in Gott/ seliglich entschlaf-  
fen/ Wie nu Johan Duss Prophetisirt hat vor  
seinem tod ( wie gehöret ) vnd die Prophecey ist  
war worden/ Also hat auch D. Martinus-  
Luther offemals/ wenn man von den Papisten  
vnd Mönchen geredt hat/ gesaget/ Wolan/ seid  
zu frieden/ Nach meinem tode fraget/ wo die  
Mönche vnd Papisten sein/ Sie werden alle ver-  
stieben vnd vntergehen/ gleich wie die sprew  
vom winde versteinbet/ darumb das sie sich nicht  
wöllen vnterweisen lassen aus Gottes wort/ vnd  
wöllen nicht von ihrem irthumb abstehe/ son-  
dern schlechts im irthumb/ Abgötterey/ vnd  
Gottlosen wesen bleiben/ Es hilfft an jnen kein  
straffen/ leren/ vermanen noch bitten/ wie denn  
Dauid im 36. Psalm auch klaget/ vnd spricht/  
Sie lassen sich auch nicht weisen/ das sie guts  
theten/ Das thun warlich die Papisten/ darumb  
wirds in auch gehen/ wie er weiter im 37. Psalm  
saget/ Ich hab gesehen einen Gottlosen/ der war  
trotzig/ vnd breitet sich aus/ vnd grünete wie ein  
Lorberbaum/ da man fur vber gieng/ **S**ihe/ da  
**L** war

war er dahin / ich fraget noch ihm / da ward er  
nirgend funden. Also trotzen die Papisten auch/  
wenn sie ein wenig lufft haben / sind sie stoltz/  
stellen sich als wolten sie vns fressen / vnd jetzt  
= fürnemlich / nach des lieben Luthers todt / da  
frewen sie sich sehr / Besser wer es ihn / sie lieffen  
sich weisen / vnd theten buss / so wurde ihnen  
geholfen vnd geraten / an leib vnd seel / Wo sie  
es aber nicht thun / wird vber sie komen Gottes  
ewig Gericht vnd straffe / Nemlich / das helli-  
sche feur vnd verdammis / Denn wer nicht buss  
thut / mus vmbkomen vnd sterben / wie Chri-  
stus selbst im Euangelio sagt / Vnd wen sie meis-  
nen sie stehen auffss festest / so sind sie / wie die  
Gottlosen dahin.

Es hat im auch der liebe Vater D. Mar.  
= Luther / selbs ein Epitaphium vnd Prophe-  
cey gemacht vom Papstumb / Welches also  
lautet.

Pestis eram viuens, moriens ero mors tua  
Papa.

Darauff mögen die Papisten wol sehen/  
das sie buss thun / das sie das Euangelium nu  
29. gantzer Jar durch gelestert / geschendet / ver-  
folget / Teuffels lere / vnd als ketzerrey verdam-  
met / die Christen darumb verjaget / ermordet/  
ertrenckt / gehenckt etc. haben / das sie nu hinfür  
anfahen das Euangelium zu glenben / vnd an-  
zunemen/

zunemen / vnd das helffen foddern etc. wo nicht /  
wie jnen Luther bey seim leben ein pestis gewe-  
sen / sie mit schreiben vnd predigen viel gedrenget  
vnd geengstiget / so wird er nach dem Tod /  
ihnen gewislich / ein tod / vnd entliche til-  
gung der gantzen Möncherey vnd ander Ab-  
götterey vnd grewel / sein. Gott helffe / das sie  
folgen vnd sich bekeren / vnd mit vns dem  
wort Gottes / glauben vnd annemen /  
vnd endlich selig werden /  
**A M E N .**

**E ij Der**



Der ander Ser-  
mon / ober der seligen Leiche Doctor  
Martini Luthers / zu Eisleben am xx.  
tag Februarij / Durch M. Mi-  
chaelem Celium / gethan /  
Anno. 1546.

**D**erweil wir nu heute zu sa-  
men komen sein / auff Gottes be-  
fehl / vnd wolhergebrachtem al-  
ten brauch / der heiligen Christli-  
chen Kirchen / bey der Leiche / des  
Erwirdigen vnd hochgelerten D<sup>r</sup>Ern Doctor  
Martin Luthers / in Gott / selig verschieden /  
Auff das wir vrsach haben / solchen tödtlichen  
abgang von hertzen zubeklagen / vnd vns wider-  
rumb auch zu trösten / Wöllen wir zum eingang  
dieses Sermons oder predigt / den spruch Esaie  
für vns nemen / da der Prophet am lvj. Capitel also sagt.

Der Gerechte kompt omb / vnd  
niemand ist / der es zu hertzen neme /  
Vnd

Vnd heilige Leute werden auffge-  
rafft / vnd niemand achtet drauff /  
Denn die gerechten werden wegge-  
rafft fur dem vnglück / vnd die rich-  
tig fur sich gewandelt haben / komen  
zum fried / vnd rugen in iren Ka-  
mern.

**D**iese wort hab ich also zum ein-  
gang / dieses Sermons fur mich  
genommen / wie gehört / nicht das  
ich aller ding den sinn oder mein-  
ung des Propheten geben will /  
Welcher / inn diesen vnd nehest vorgehenden  
worten / beschreibt die falschen vnd rechtschaf-  
fenen Lerer der Kirchen / Wer die sein / Was  
ihre eigenschafft thun / wesen vnd ende sey / Als  
nemlich / die falschen vnd vnrechten Lerer /  
sagt der Prophet / das sie wol Wechter sein /  
das ist / Sie sitzen in ordentlichem Ampt der  
Kirchen / wie auch itzund der Papsst / seine  
Cardinal / Bischoff / Mönch vnd Pfaffen /  
Aber es sind blinde Wechter / die nichts wis-  
sen / keinen verstand der Schrift / noch des  
Geheimnis. des heiligen Euangelij haben /

L ij. Dazu.





Dazu sind sie stumme Hunde / die nicht strafen können / sind faul / liegen vnd schlaffen gern / Aber es sind gleichwol starcke Hunde von leibe / die nimer sat werden können / geitzen vnd raffen aller Welt güter zusammen / Daraus sie in aller wollust leben / vnd endlich das hellisch fester zu lohne haben.

Aber die auffrichtigen vnd rechtschaffenen Lerer / der einer auch / dieser vnser lieber Herr vnd Vater in Christo / Doctor Martin Luther gewesen ist / das sind gerechte / das ist / Die Gott in seinem Wort warhafftig erkand / vnd die gerechtigkeit des glaubens / so fur Gott gilt / sampt den guten Wercken / die er geboten hat / Leren vnd Predigen / Vnd diese haben nicht viel guter tage inn der Welt / welche nicht ruget / bis sie vmbkomen / vnd auffgerafft sein. Als denn aber / schleust der Prophet / können sie zum friede vnd rügen inn ihren Kamern. Aber dis wollen wir also fahren lassen / vnd zu diesem mal / wie oben gehört / auff das wir vns / des abscheids / dieser Leiche annemen / vnd / wie vns Paulus zum Thessalonicern nachlest / trawren / aber doch auch widderumb Christlich trösten mögen. So wil ich allein anzeigen / was D. Martinus vor ein Man vnd Lerer gewesen / wie / vnd warumb er itzund zu dieser zeit im Herrn entschlaffen / Vnd was nu endlich bis auff den Tag des Herrn / sein thun vnd wesen sey. Wein

Wenn man in der Welt einē Man beschreibē  
oder loben wil / so sagt man / was ehrlichs ge-  
schlechts / wer seine Voreltern / was standes /  
wirdens vnd wesens er sey / Was vor gute tū-  
gende vnd sitten er gehabt / wie er derselbigen  
gebraucht / vñ sein ende beschloffen habe. Vnd  
wer hierinnen einen guten Namen hat / das ist  
ein grosse gabe Gottes / Sonderlich wo es re-  
cht gebraucht wird / vñ billich / das man Gott  
dafür dancke.

Vnd wiewol man des viel / auch von die-  
sem tewern Man sagen künde / Das er sampt  
seinem Geschlecht / vñ vielleicht den namen vnd  
herkomen / von Keiser Luther haben / Oder  
aber doch / wie es mit den Geschlechten in der  
Welt pflegt zu gehen / das sie im ansehen steigē  
vñ fallen / Wie auch Danids Stam zu Christi  
zeiten gefallen war / das ihn Esaias einem alten  
dürren ploch vergleichet / Vñ nu dieses vnser lie-  
ben herrn vnd Vaters Geschlecht / auch nicht  
mehr in grossen ansehen ist. So weis aber glei-  
chwol das / diese Stad Eisleben vñ das gantze  
Mansfeldische Land / das er von ehrlichen fro-  
mē Eltern / alhie zu Eisleben Ehelich geboren /  
vñ als ein Christ getaufft wordē / Vñ nach einē  
halben jar / haben in die selben seine Eltern zu  
Mansfeld erzogē / da sie den mehrn teil jres le-  
bens / in ehren zu bracht / Welch jr lebē sie auch  
alda beschloffen / vnd beide / Vater vnd Mut-  
ter / wie er der liebe Man Gottes / auch mir  
inn

Inn meinen henden / mit seligem bekenntnis ih-  
res glaubens / vnd anruffung Göttliches na-  
mens / im Herrn entschlaffen sein / Den Gott  
ewiglich genade.

So köndte man Ihn auch viel seiner gu-  
ten tügenten halben rühmen / den er messigkeit  
vnd zucht geliebet vnd gehalten hat / des ihm  
mit warheit niemand anders nach sagen kan /  
Aber von diesem vnd andern / wil ich andere /  
die grössers vermögens zu reden vnd schreiben  
sein / sagen lassen / Vnd zu diesem mal / alleine  
anzeigen von seinem Ampt / dazu er von Gott  
beruffen / das er inn der Kirchen geführt / vnd  
was die heilige Christliche Kirche an ihm ge-  
habt habe / ein wenig ewer liebe vermanen.

Es sol niemand / der Gottes Wort vnd  
Warheit erkand hat vnd liebet / daran zweif-  
eln / Das dieser Man / des selige Leiche wir  
noch alhie fur vnsern augen sehen stehen / das  
Ampt inn der Kirchen geführt / Welches zu sei-  
ner zeit / Elias vnd Jeremias / Johannes der  
Teuffer / oder der Aposteln einer geführt haben /  
Denn ob diese wol mit etzlichen sonderlichen  
Gaben / vor ihm / sind von Gott begnadet ge-  
west / Doch so viel das Ampt belangt / ist er  
warhafftig zu vnser zeit / ein rechter Elias oder  
Jeremias / Vnd fur dem grossen Tage des  
Herrn /

**D**er Herr / Johannes der vorleuffer / obder ein  
Apostel.

Denn man se sagen mus (wer die warheit  
bekennen wil) das inn der Kirchen eben gestan-  
den / da Gott diesen Man inn sein ampt erwecket  
vnd beruffen hat / wie es stund zun zeiten Elie /  
Jeremie / Johannis / vnd da die Aposteln  
von Gott zupredigen ausgesand wurden. Die  
Schrift sagt. 1. Reg. 18. Das zur zeit des Pro-  
pheten Elie / das gantze Israhel von Gott ab-  
gefallen / vnd dem Abgöttischen dienst Baal an-  
gehangen sey / Das auch Elias klaget / er sey al-  
leine ein Prophet vberblieben inn Israhel / alle  
andere waren abgefallen / vnd dienete einer die-  
sem / der ander einem andern Gott / Der warhaff-  
tige Gott hatte nicht mehr denn einen einigen  
Propheten / Baal hatte ihr 450. So waren der  
Propheten des Dayns die vom tisch Isebel as-  
sen auch vierhundert.

Also auch zur zeit Jeremie / klaget Gott  
vber sein volck am 2. Capit. vnd sagt / Ir habt  
mein erbe zum gewel gemacht / Die Priester ge-  
dencken nicht / wo ist der Herr? vnd die gelerten  
achten mein nicht / vnd die Wirten führen die leu-  
te von mir / vnd die Propheten weissagen vom  
Baal / vnd hengen an / den vnnützen Götzen /  
Ich mus mich immer mit euch / vnd mit ewern  
kindskindern schelten / Spricht der Herr.

Wie es aber in der Kirchen stund zur zeit

§ Johannis

Johannis des Teuffers / ist klar aus dem neuen  
Testament zu sehen / das / ob nach der Babilo-  
nischen gefengnis schon die Abgötterey nicht  
auffgericht wurd / wie zunor / so hatte sich aber  
das volck inn Secten zuspalten / vnd waren  
Effeer / Phariseer vnd Saduceer / der iglicher /  
wolte besser sein denn der ander / verlies sich ider  
teil / auff sein eigen gut leben / Vnd wie der Pro-  
phet saget / beteten an / das werck irer eigenen  
hende / Darüber schreiet vnd klaget nn / vber al-  
le mas / der Prophet Hieremias. Elias aber /  
tödtet auff einen tag alle Baalitischen Pfaffen /  
Johannes heisset sie Schlangen vnd Otterge-  
zicht / Greiffen mit hohem Geist in alles Abgöt-  
tische wesen / stossen es vmb / vnd richten wides-  
rumb auff / die reine lere von der Buss vnd Ver-  
gebung der Sünden / vnd leren was ein recht-  
schaffener Gottes dienst sey.

Also / meine lieben Freunde / wie oben be-  
rürt / hat es auch / leider / gestanden inn der heil-  
gen Christlichen Kirchen / itzund inn den letzte-  
ten tagen / vnter dem Beshstischen Antichrist /  
Da sind alle irthumb / Ketzerey / Secten vnd Ab-  
götterey / zusammen inn eine. grundsuppen alles  
grewels / geflossen / Es ist kein rechter verstand  
der heiligen Schrift geweest / keine reine lere zu  
trost der Gewissen gepredigt / Menschen sa-  
tzung sind vber Gottes wort gehalten / Nie-  
mand

mand hat gewußt / wie man Gott anrufen /  
wes man sich inn nöten zu ihm versehen / was  
man doch thun / oder wie man im dienen solte /  
finsternis haben bedeckt den gantzen erdboden /  
kein liecht hat geschienen inn der Kirchen / In  
summa / wie der Prophet Ezechiel sagt am 34.  
Cap. Die Schaff haben geirret / wie inn einer  
wüsten auff allen bergen / da kein Dirte ist. Vnd  
auch / wie Esaias am 53. spricht / Ein jglicher ist  
auff seinen weg gewichen / Aber Gottes weg /  
welchen die Schrifft leret / vnd Christus der  
Son Gottes ist / den hat niemand gangen / Vnd  
ist der schade grösser / denn ihn jemand mit wort  
ten erlangen mag.

Denn wie zur zeit Elie / nicht Gott / son-  
dern Baal angeruffen wurd / vnd zu Johannis  
des Teuffers zeiten / alles voller Secten war /  
vnd eine der andern sich fürziehen wolte / Also  
hat man die verstorbenen Heiligen / ja auch  
wol holtz vnd Steine / vnd wie man inn vn-  
serm Mansfeldischen Lande erfahren / den Weis- = 4  
denstock / welchen sie Gednt / genant / vnd den  
Guten Lupen / welches ein todter Hund sein = 5  
sol / angeruffen / vnd bey ihnen trost vnd  
hülffe gesucht / wie inn andern Landen auch  
geschehen. Vnd die Starcken pfeiler der An- =  
tichristischen Kirch / die elenden Theo- =  
f 4 logen

Logen zu Löwen / inn iren Artickeln / noch bestet-  
gen vnd erhalten wöllen.

So sehe man auch an / die seltsamen vnd  
wunderlichen Secten / das es zu Johannis ze-  
iten kinderspiel gewest / gegen dem wüsten gewel  
der Mönch / Nonnen / Cardinel / Bischoff / vnd  
alles geistlichen hauffens / da es keiner mit dem  
andern gehalten / jedere Sect einen eigen Gott /  
ire eigen werck / Regeln vnd Orden auffgewor-  
fen / dadurch sie haben wöllen selig werden / Vnd  
ist der glaub an Ihesum Christum / bey ihn gar  
eine schlechte sache gewest / man müste viel höher  
vnd grösser ding zur seligkeit haben / denn der lie-  
be Gottes Son geleret hat.

Also ist in der Kirchen / leider / gestanden /  
wie es noch zu beweisen ist mit der that / wo der  
Bapst regirt / Als lange bis vns Gott / vor seinem  
grossen Tage / den tewren Man erwecket hat /  
der zu vnser zeit ein rechter Elias vnd Johannes  
gewest ist / Denn wie Elias zu seiner zeit die Ab-  
götterey angegriffen vnd nidergelegt / also hat  
Doctor Martin Luther / auch den gewaltigen  
Abgott / des Bestischen Abblas / angetastet /  
vnd zu bodem geschlagen / Vnd wie Elias die  
Pfaffen des Baals tödtet / also hat der Man  
Gottes / mit dem Schwert Göttliches wortes /  
die Messpfaffen / vnd iren Abgott vmbgestossen.  
Dagegen

Dagegen aber hat er / wie Johannes der  
heilige Teuffer / Christliche vnd rechtschaffene  
Bussse geleret vnd geprediget / wie / vnd wo  
durch man zu rechtem erkentnis der Sünde  
kome / Wodurch man vergebung derselben er-  
lange / Was rechtschaffene fruchte der Bussse  
sein / Wie man Gott dienen / vnd ihn anrufen  
sol / Welche Stende von Gott geordnet / was  
ein jeder inn seinem stand thun sol / Vnd inn  
Summa / die heilige Schrift / welche zuor  
ein verschlossen vnd versiegelte Buch war / hat  
Gott durch ihn eröffent / das sind der Apo-  
stelzeit / sie mit solchem verstand / wie itzund /  
nicht ist gelesen worden.

Denn da haben wir nu einen richtigen  
vnterscheid / des Gesetzes / vnd Euangelij /  
was jedes sey / was es wircke / wie man seiner  
seliglich gebrauchen sol / Welches gute werck  
sein / wie die Gott gefallen / warumb man sich  
darinnen sol vben / was den selbigen durch  
Gottes verheissung folge. Vnd ist dieser ver-  
stand / auch den lieben Vetern / als Hierony-  
mo / Cypriano / Tertuliano vnd andern / gar  
seltsam vnd tawer gewesen / aber etzlich hundert  
jar vnter dem Papstumb gantz verfallen / das  
man keinen beständigen trost der Gewissen / inn  
anfechtung vnd Todes nöten / hat haben könn-  
nen / So die Mönche bey sterbenden mens-  
chen

F iij schen



sehen gewest / vnd sie trösten sollen / haben sie die selbigen auff Mariam gewest / Den da hat man den leuten furgesungen vnd gesagt / Maria mater gratie, mater misericordie, tu nos abholte protege, in hora mortis suscipe. Das ist / Maria die du bist eine Mutter der gnad vnd aller Barmhertzigkeit / Errette vns von vnsern Feinden / vñ nim vns auff / in der stunde des Todes / Odder haben sie auff andere Weiligen / ihre orden vnd gute werck gewest / Welchs die lieben Weiligen nie begert / vnd die gewissen keinen beständigen grund gehabt / des sie sich hetten trösten mügen / Sind endlich inn verzweiffelung ihrer Sünden gestorben.

Itzund haben wir aber / den gewissen vñ warhafftigen grund / das wir auff den Son Gottes / Jesum Christum vnsern lieben Herrn vnd Heiland / leben vnd sterben / Singen mit dem lieben Simeon / Nunc dimittis seruum tuum Domine etc. Mit fried vnd freud / ich fahr dahin / inn Gottes wille etc. Item / Wir sagen mit dem lieben Stephano / Herre Jesu / Nim meinen Geist auff zu dir. Vñ wissen mit Sanct Paul / das / Wir leben odder sterben / So sind wir des Herrn.

Ja wer hat vns aber diese selige kunst gelehret / vnd den grund angezeigt / Dawider alle hellische Pforten nichts vermögen / Das aus creutz vnd leiden / trost vnd freude / Aus dem Tod /

Tod/ein feiner sanffter vñ sicherer schlaff/wer-  
den mus/Wie man an vnsern leuten vnter dem  
heiligen Euangelio/Gott lob/an so viel/ beide  
jungen vnd alten/fürnemlich aber/wie wir hö-  
ren werden / an diesem Manne Gottes/ erfarn  
vñ gesehen haben/das keine furchte des Todes  
an ihn gespüret wird / vnd etzliche mit gesang/  
etzliche mit hertzlichem begir / vnd anruffung  
Göttliches namens / vnd mit freuden sich inn  
Tod begeben.

Freilich haben wir die kunst nicht vom  
Papst/welcher lieber wölte/das wir noch auff  
seine Abblas Brieff/vnd gnade stürben/vnd als  
so ewig verdürben/Allein/das er sampt den sei-  
nen/inn würden vnd reichthumb / ein sanfftes  
Epicurisches leben führen möchte/So lerens die  
Bischoffe auch nicht/den sie weder predigen/  
noch die Francken besuchen/So wolten vns die  
Mönch viel ieber in ihren Mönchstappen/vñ  
auff ihre örden begraben / dann das wir auff  
Christum sterben / Ihrenthalben würden wir  
den rechten weg zum ewigen lebē nicht treffen.

Darumb haben wir solches / Gott dem e-  
wigē Vater vnser Herrn Jesu Christi/zu dan-  
cken/ der durch seinē heiligen Geist/aus grunds-  
loser gnad vñ barmhertzigkeit/diesen seinen tre-  
wen Diener/erleucht/vñ erwecket hat/ der mit  
allem vleys vñ trewē/durchs Euangelium/den  
Son Gottes geprediget / wie der/ der alten  
Schlangen den Kopff zutrette / das ist /  
vom



**BLB**

Badische Landesbibliothek  
Karlsruhe

vom Teuffel vnd seiner gewalt errette / Vnd  
zum Tode saget / Tod? Wo ist nu dein Stas-  
chel? Welle / wo ist dein sieg? Aber der Stas-  
chel des Todes / ist die Sünde / Die krafft aber  
der Sünde / ist das Gesetz / Gott aber sey danck /  
der vns den Sieg gegeben hat / durch vnsern  
Herrn Ihesum Christum. Dis ist / das der  
Man geleret hat / vnd die Bleibigen daraus  
einen mut fassen wider Sünde / Tod / Welle /  
vnd Teuffel.

Wolan / der Man / welcher zu vnsern zeis-  
ten / im Geist vnd krafft Elie gewandelt / auch  
ein vorleuffer vor dem Jüngsten tage / ein rech-  
ter Johannes gewesen ist / Der ist nu durch sei-  
nen letzten abschied dahin / vnd werden ihn  
vor dem ende der Welt / nicht mehr sehen / Da-  
rumb wir billich auch / wie Elisa der Prophet /  
2. Reg. 2. Klagen / Mein Vater / Mein Vater / Wagen /  
Israel vnd sein Reuter. Vnd mit den Jüngern  
Johannis / ihn mit allen ehren Christlich zur er-  
den bestatten. Wir sollen aber auch nicht  
vnterlassen / mit dem Elisa nach dem Mantel  
dieses Elie zugreifen / welches sind seine Bü-  
cher / die er aus eingebung Gottes Geistes ge-  
schrieben / vnd hindersich verlassen / Auff  
das wir auch seines Geistes daraus empfaben /  
Denn ob er nach dem leib gestorben / so lebt er  
aber nach seinem Geist / vnd inn seinen Büch-  
ern /

ern / Er wirt auch / wils Gott / mit seinen Schriff-  
ten / nach seinem tod / des Papsis tod sein / wie  
er bey leben seine Pestilentz geweest ist / Vnd mö-  
gen vns nu also zu den selbigen bücher halten / sie  
lieb vnd werd haben / die vns auff die heilige  
Schrift weisen / vnd Gott dafür dancken. Vnd  
das sey gesagt / so viel das erste stück belanget /  
Nemlich / was Doctor Martin Luther geweest /  
vnd wo fur man ihn ansehen vnd halten sol /  
Als / der vnser zeit / Elias vnd Johannes ge-  
west sey / Nicht ein gemeiner prediger / wie ich /  
vnd meines gleichen / Sondern ein hoher treff-  
licher Man / dadurch Gott seine Kirche wide-  
rumb gereiniget / vnd mit reiner lere / vnd war-  
hafftigen Gottes dienst beghadet hat .

Zum andern / wöllen wir auch sagen vnd  
hören / wie er gestorben sey / Denn er ist noch  
nicht begraben / auch nicht mehr denn einen  
tag tod geweest / Vnd finden sich / wie mir für-  
kompt / bereit an leute / die durch den bösen Geist  
getrieben / ausbringen sollen / als hab man ihn  
in bette tod funden / Nu trage ich nicht zweifel /  
der / so von anbegin ein Lugener ist / wird noch  
mancherley mehr / vnd geschwinder lügen erden-  
cken / Denn es ihm nu nicht mehr vmb Doctor  
Luther zuthun / den hat Gott aus seinen zeenen  
gerissen / er vermag an ihm nichts mehr / Aber  
vmb die Lere ist es ihm nu zu thun / der wolte er  
G      gern

gern schaden thun / vnd sie vertilgen / Damit  
wir ihm aber begegten / vnd die gleybigen für lü-  
gen verwaren / so wil ich / als einer der bey seinem  
letzten abschied / vnd nu drey wochen / tag vnd  
nacht bey im gewesen / die warheit / seines abschie-  
des / hie an Gottes stad / vnd für Gott / anzei-  
gen.

Es hat lieben freunde / Doctor Martinus  
nicht erst die vergangene nacht angefangen zu  
sterben / Sondern lenger denn ein gantz Jar /  
hat er imer gestorben / Das ist / mit gedanken  
vom tod vmbgangen / Vom Tode geprediget /  
Vom Tode geredt / Vom Tode geschrieben / wie  
ich denn den tag zuuor / ehe er sein ende beschloß  
sen / vil tröstlicher sprüche aus seinem Psalter / die  
er darein verzeichent / geschrieben / sich damit zu  
trösten. Er hat Gott offte angeruffen vnd gebe-  
tten / er wolte ihn / je ehe je besser / aus dieser bösen  
Welt hinweg nemen / er sey dises lebens vberdrüs  
vnd müde. Er hat auch gebeten / wo es Gott  
wol gefiele / das er sich nicht lang auffm siechbet  
quellen müste / So fülete er sich auch / als einen al-  
ten abgearbeiten schwachen Man / Darumb er  
offte gesagt / Ich werde nicht lange mehr leben /  
Vnd sonderlich kurtz für seinem ende / redet er  
noch die wort / Wenn mich der Papsst oder mei-  
ne Widersacher inn ihre hende bekemen / vnd  
mir schon viel leides anthun wolten / so bin  
ich

ich zu schwach / ich stürbe ihn bald inn fren hend  
den .

Also / wie er sich allenthalben zum tod wol  
gerüstet / hat Gott sein gebet vnd seufftzen gnes  
diglich erhöret / Vnd wie er das Nachtmal ge  
halten / vnd hie zu Lisleben / aus der grossen  
Stuben / in sein klein Stüblin den .17. Februaris  
vmb acht vhr gangen / vnd seiner gewonheit  
nach / ins Fenster gelegt / sein gebet zu thun / hat  
es nicht lange gewehret / sieng an vnd klaget /  
wie ihm vmb die Brust fast wehe würde / Als  
riete man ihn mit warmen tüchern / man gabe  
ihm auch von geschabtem Einhorn ein / mit  
wein zutrinken / das es wol besser mit im wur  
de / vnd sich nidder ins Kugebettlin leget / da ent  
schlieff er / bis der Zeiger zehen schlug / Vnd do  
er erwachet / sprach er zu Doctor Jonas vnd  
mir / die wir auff ihn warteten / warumb wir vns  
nicht möchten niederlegen / Aber wir gaben zur  
antwort / Es gebüret vns itzund auff ihn zu  
warten.

Da stund er auff / klaget nichts sonder  
lichs mehr / vnd gieng inn die kamer zu seinem  
bette / Vnd als er vber die Schwelle schreid /  
Sprach er / In manus tuas commendo tibi Spiri  
tum meum, Redemisti me Domine Deus veritatis.

G ij Das

Das ist / inn deine hende befehl ich dir meinen  
Geist / du hast mich erlöset / du trewer Gott / Vnd  
also leget er sich nider zu bett / gab vns gute nacht  
vnd sprach / Doctor Jona / vnd Herr Michel /  
Betet für vnsern Herrn vnd Gott / das jm wol  
gehe mit seiner sach / vnd dem heiligen Euange-  
lio / Denn die zu Trent im Concilio / meinens  
nicht gut mit ihm.

Also schlieff er widerumb ein / vnd ruget  
natürlich / wie man anders nicht vermercken  
künd / bis der zeiger nach Mitternacht eins schlug  
da wachet er auff / vnd rieff seinem Samulo / das  
er jm das stüblin solte warm machen / als aber  
dasselb schon warm gehalten / richtet er sich  
auff / steig aus dem bett vnd saget / O Doctor  
Jona mir wird wehe / besorg / ich werd nu wol  
zu Eisleben bleiben / vnd mit dem / gieng er wide-  
rumb ins Stüblin / vnd da er vber die schwelle  
schreid / sprach er aber / wie vor / In manus tuas  
commendo tibi Spiritum meum, Redemisti me  
Domine Deus veritatis. Vnd als er ein mal oder  
zwei im stüblin hin vnd wider gangen / legt er  
sich wider auff's Kugebettlin / vnd nam die  
franckheit je mehr vnd mehr vberhand / Also  
bald rieben wir ihn wider mit warmen tüchern /  
vnd sandten so bald nach dem Wirt im hause /  
beiden Stad Ertzen / Desgleichen auch nach  
dem Edelen vnd Wolgebornen Graffen vnd  
DE Arn / DE Arn Albrechten / Graffen  
vnd

vnd Herrn zu Mansfelt. / Vnd kam ( da der  
hochgelerte herr Doctor Jonas / Ich Michaa  
el Celius / Johannes Aurifaber vnd sein Fa  
mulus / bey ihm von anfang gewest waren )  
so bald der Wirt mit seinem Weib / darauff  
der eine Artzt / bald der ander auch / Vnd folg  
gends / Graff Albrecht / sampt seinem gemahl.

Da wir ihn nu inn des / wie gesagt / mit  
warmen Tüchern gerieben / fraget ich / ob er  
auch linderung fület / Antwort er / ja / die wer  
me thut mir wol / wermet auch Küssen auff  
mich / es drücket wol hart / schonet mir aber  
noch des hertzens / Vnd / als ich Michael  
Celius fület / das ihm das hembde gantz nass  
war / Sprach ich zu ihm / Xenerende pater /  
Ihr habt wol geschwirzet / Gott wird genad  
geben / das es besser wird / Antwort er / Ja  
es ist ein kalter toden Schweis / Ich werde  
sterben / Ich werde dahin faren. Vnd inn  
dem man ihm einen trunck Weines reichet /  
auff sein erfodern / Vnd der eine Artzt ihm  
inn einem löffel eine Artzney eingab / Sieng  
er an.

Ich dancke dir Gott / ein Vater vn  
sers Herrn Ihesu Christi / das du mir deis  
nen lieben Son hast offenbart / dem ich ges  
G iij                      gleubt /



glenbt / den ich geliebet / den ich gepredigt /  
bekand vnd gelobet hab / Den der Papst  
vnd alle Gottlosen schmehen vnd lestern /  
Mein Herre Ihesu Christe / Las dir mein  
Seelichen befohlen sein.

O Himlischer Vater / ich weis / ob ich  
schon von diesem leib hinweg gerissen werd /  
das ich bey dir ewig werd leben.

Sic Deus dilexit mundum, vt vnigenitū  
filium suum daret, vt omnis qui credit in eum  
non pereat, sed habeat vitam æthernam.

Das ist / Also hat Gott die Welt gelie-  
bet / das er seinen einigen Son gebē hat / auff  
das alle die / so an ihn glenben / nicht verlo-  
ren werden / sondern das ewige lebē haben.

Er sprach auch weiter / Deus noster  
Deus saluos faciendi, tu es Deus qui educis  
ex morte, Das ist / Wir haben einen Gott  
der da hilfft / vnd den Herrn Herrn / der  
vom Tode errettet.

Als er nu fület / das das ende nicht fern  
war / sprach er drey mahl / Pater, in manus tuas  
as commendo tibi spiritum meum. Vater in deine  
hende /

hende/ befehl ich dir meinen Geist. Darauß  
schwig er stille / Wir rüttelten aber ihn / Vnd  
schrey Doct. Jonas vñ ich / Reuerendepater /  
Wollet ihr auch auff ewern D<sup>er</sup>rn I<sup>esu</sup>m  
Christum sterben? vnd die Lere so ihr in seinem  
namen gethan/ bekennen? Antwortet er / Ja /  
Vnd wendet sich auff die rechte seite / sieng an  
eine halbe viertel stunde zu schlaffen. Vnd als  
wir dem schlaff nicht vertrauerten/ sondern ihn  
mit Aqua vite/ vnd Rosen essig bestrichen/ vnd  
die Pulsadern rieben / als der Zeiger ein viertel  
stund noch hatte auff drey vhr früe / vñ wir im  
vnter augen leuchteten/ thet er ein tieffen odem  
holen / vñ hiemit gab er sanfft vñ in aller stille /  
mit grosser gedult seinē Geist auff. Vñ dis weis  
Gott / fur dem Wirns auch auff vnser gewissen  
nemen/ vnd wollens am Tage des D<sup>er</sup>rn / ge-  
stendig sein vñ zeugen / das mit seinen abschied  
also / vnd anders nicht / ergangen sey / Wie  
man das selbige in einer Distoria zusammen ges-  
tragen/ im Druck freilich wird reichlicher aus-  
gehen lassen.

Das hab ich nu nach der lēge erstlich da-  
rumb erzelet / Das man dem Teuffel vñ den se-  
nen/ ihren lägenhaftigen rachen stille / Vñ da  
man anders/ deñ wie itzund gehört/ danon re-  
den wird/ das man dem nicht stat noch glaubē  
gebe / Deñ ich vnd ander/ so daneben gewest/  
wollen

wollen des lebendige Zeugen sein / Wer vns nu  
glauben geben wil / wol gut / Wer nicht wil /  
der fare hin / liege vnd triege / auff seine ebena  
thwer / Er wird sein Richter endlich wol fin  
den / Ich weis / Gott lob / das ich der war  
heit zeugnis hierinnen geben hab.

Zum andern / hab ich diese Geschicht auch  
wollen erzelen / darumb / das wir vns auch ler  
nen zu dem letzten stündlin / bereiten / vnd ge  
schick machen / wie sich dieser vnser trewer hirt  
vnd Lerer bereitet hat / Denn ob wir wol alle  
wissen / das wir sterben müssen / so sind ihr  
doch gar wenig / die sich dazu schicken vnd be  
reiten / das sie sich mit glauben willig darein  
begeben / Darumb wie wir von diesem Man  
gehört / der ein grosser Doctor der heiligen  
Schrift gewest / vnd mit viel gaben / fur an  
dern begnadet / Noch ist er ein lange zeit / mit  
eitel todes gedancken vmbgangen / hat die sp  
ruch der heiligen Schrift / so in todes nöten  
trösten / zusammen gezogen / vnd im hertzen wol  
bewogen / oft mit andern dauon geredt / vnd  
in des / doch seines Ampts oder beruffs trew  
lich gewartet / Darumb ist er auch in die stun  
de komen / da er selbs noch nicht weis / wie er  
gestorben / vnd gleich wie mit einem schlaffen  
den / der nicht weis / wie / vnd wenn / er ein sch  
lefft / also ist er auch zu dieser seiner seligen ruge  
komen /

Fomen. Vnd diese Kunst sollen wir auch aus  
dieser geschicht lernen.

Vnd nach dem wir nu auff's kurtzt vnd  
einfeltigest gehört / Wer Doctor Martin Lu-  
ther gewest / Wie er gestorben / vñ was wir da-  
raus lernen sollen / das es zu vnser seligkeit vnd  
Christlichem leben / dienstlich vnd fruchtbar  
sey / So wollen wir nu zum dritten hören vnd  
bewegen / warumb er so eben itzund inn dieser  
zeit gestorben sey / da man seiner vber alle masse  
sehr nötig bedürfft hette / Inn der Christli-  
chen Kirchen / wider welche sich der Papst  
mit seinem Tridentischen Concilio / vnd alle  
Weltliche Pforten aufflehnen / vnd das wort  
der warheit / so Gott durch diesen seinen Die-  
ner vnd Apostel / offenbart / gedencken zu dem-  
pffen vnd vnter zu drücken.

Es werden alhie ihr viel mancherley vr-  
sachen furwenden / seines abscheids halben /  
Vnd etzliche sagen / ein alter man solte vmb dies-  
se zeit / vnd inn solcher kelte nicht gereiset ha-  
ben vber Land / Man solte ihn inn diesen sa-  
chen zu handeln / verschonet haben / Were er  
zu Wittenberg blieben / hette sich sonst oder  
so gehalten / er lebte wol nach etc. Es ist  
war / der vernunfft noch / sind dis gedanken  
vnd rede / die man etwas mus sein lassen / **Az**  
**D** ber

ber wer ihn nachfolget / den führen sie ins wilde  
Meer / Vnd gleich / wie das selbige / von Win-  
den auffgetrieben / keine ruge nimer haben kan /  
also lassen diese gedancken / inn dem vnd andern  
fellen / einen menschen zu keiner ruge noch fride  
komen.

“ Derhalben müssen wir alhie in vnsern Kin-  
der glauben / vnd sagen / Ich glaub an Gott  
Vater almechtigen / schöpffer Himels vnd der  
Erden. Welchs nicht alleine zuuerstehen / als  
habe Gott Himel / Erd / vnd alle Creaturn ge-  
schaffen / sondern auch das er die selbigen regire  
vnd erhalte / one seinen willen nicht ein har von  
vnserem heubt falle / wie Christus sagt Luc. 21.  
Vnd David im 39. Psalm. Herr / Lere mich  
doch / das ein ende mit mir haben mus / vnd  
mein leben ein ziel hat / vnd ich danon mus / Al-  
so saget auch Job am 14. Der mensch hat seine  
bestimpte zeit / die zal seiner Wonden stehen bey  
dir / du hast ein ziel gesetzt / das wird er nicht v-  
bergeben / Durch diese wort füret vns der hei-  
lige Geist / aus den gedancken vnserer ver-  
nunfft / vnd hilfft vns aus dem wilden Meer /  
in einē sichern Port / Das wir alhie stille halten  
vnd sagen müssen / Es sey der wille Gottes /  
// Gott hats also geschickt vnd haben wollen /  
das er in dieser Stad Lifsleben hat sollen sein  
ende beschliessen / darinnen er geboren vnd ge-  
taufft ist worden. Aber

Aber aus was vrsachen er itzund diese zeit  
von Gott abgefodert / das ist ein andere frage /  
Nu findet man in der heiligen Schrift / mehr  
denn eine vrsache / warumb ein jeder zu seiner  
zeit stirbet / Bisweilen nimpt Gott so bald nach  
der Tauffe / die kinder vnd junge Leute sonst  
auch hinweg / Vnd zeiget das Buch der Weis-  
heit am 4. Cap. diese vrsach an / Gott thu es  
darumb / das die bosheit ihren verstand nicht  
verkere / noch falsche Lere ihre Seele betrie-  
ge / Den die bösen Exempel verführen vnd verderben  
ein das gut / vnd die reizende lust verkeret vn-  
schuldige hertzen / Sie gefallen Gott / darumb  
eilet er mit ihn aus diesem bösen leben.

Vnd dis ist gar ein feiner trost / fur die El-  
tern / den ihre kinder in der jugent dahin sterbē /  
Es thut der vernunft vnd natur vber die masse  
wehe / das man kinder vnd junge lente also se-  
het dahin fallen / auff die man trost vnd viel  
hoffnung gesetzt hat / es meinet auch mancher  
er wolte aus seinem Son ein ehrlichen Man /  
Eine Mutter / aus ihrer Tochter ein tugentsa-  
me Jungfraw / gezogen haben / Aber lieber  
Gott / man sihet / wie die Welt so reizet / mit  
bösen Exempeln / So feiret der Satan auch ni-  
cht / lere vs leben zu verderben / Vnd wir haben  
ein armes gebrechliches fleisch / durch die Erb-  
sünde so gar verderbt / das / ob sie wol inn  
der Tauff zgedeckt / vnd wie ein feuer mit  
D ij aschen

aschen verscharren wird / Doch so bleibt die  
Sünde in vnserer natur / vnd (wie eine Magd  
zu morgens in der aschen stüret / vnd das fewer  
widerumb anzündet / Also auch / weñ man zur  
vernunfft / vnd jaren kompt / so bleset / Teuffel /  
Welt / vnd vnserere eigene luste zu / das verdeckte  
fewer / die Erbsünde zu erregen / Da mus nu  
Gott zu nor komen / vñ durch den Tod / die kin-  
der / weil sie noch im ihrer vnschuld sein / erret-  
ten / Vnd das / hab ich gesagt / sollen die Eltern  
ihn / lassen ihren trost sein.

Darnach so nimpt Gott oft die Tyrannen  
hinweg. Als / Pharao / mus mit den seinen im  
Rotten Meer ersauffen. Sennaherib / von  
seinen eigenen kindern / inn seines Abgotts  
Tempel erwürget werden. Nero sich selbs  
erstechen / Vnd Julianus im Perser krieg er-  
schossen werden / Darumb das Gott seine  
Kirche für ihn erhalte / vnd sie ihn mit seinem  
Wort vnd Reich / nicht gar austilgen / wie sie  
im sinnen haben. Vnd diese Exempel sind  
auch zum trost geschrieben / ob wir bey vnserer  
zeit auch sehen / grosse Leute das Euangelion /  
vnd die ihm anhangen verfolgen / das wir wis-  
sen / der Gott lebe noch / vnd halten ober seiner  
Kirchen / der Pharaonen vnd ander Tyrannen  
gestürzt / Seine hand ist nicht verkürtzt noch  
zu schwach worden / Er weis die seinen wol zu  
schützen / vñ die Tyrannen zu stürzen.

Wenn

Wenn aber die Propheten sterben / vnd  
von Gott hinweg gefordert werden / da hat  
gemeinlich Gott im sinnen / das eine Straffe  
folgen sol / wie er inn der Schrift offte heiligen  
leutē zusagt / Er wölle jnen halten bey ihrem le-  
ben / Aber nach ihrem abschied / so sol die straff  
folgen / also / Da Samuel der Prophet tod ist /  
fallen die Philister ins Land / erwürgen Saul /  
samt dreien Söhnen / vnd grösser anzahl volcks /  
nemen viel Stedte ein / darinnen die Kinder  
von Israhel gewonet. Also auch nach abgang  
der andern Propheten / folgete die Babilonische  
gefengnis / vnd da Gott alle Aposteln zu sich ge-  
fordert / bis auff Johannem / der alleine noch  
vberig war / kam die zustörung Hierusalem /  
samt dem gantzen Jüdischen Lande / welche  
noch weret bis auff diesen tag / vnd werden fur  
dem Jüngsten tag / die Jüden in ihr Land / Re-  
giment vnd Gottes dienst / nicht komen.

Vnd ist solcher straff ursach gewest / das  
sie die Propheten / Christum vnd seine Aposteln  
nicht haben hören wöllen / Sondern die selbi-  
gen gelestert vnd verfolget / als lange die rute  
Gottes komen / vnd sie jren verdienten lohn auch  
empfangen haben / wie im andern Buch der  
Chronica am 36. Cap. geschrieben stehet / Der  
Herr / ihrer Väter Gott / sandte zu ihn / durch  
seine boten früe / denner schonete seines volcks /

D iij vnd



vnd seiner Wohnung / Aber sie spotteten der bö-  
ten Gottes / vnd verachten seine wort / vnd effeten  
seine Propheten / bis der grim des Derrn vber  
sein volck wuchs / das kein heilen mehr da  
war etc.

So ist auch gros zubeforgen / das Gott diesen  
seinen Diener hinweggenommen hab / vmb vnser  
Sünde willen / Denn / wie droben gehort / Er  
hat rechtschaffene Buss vnd vergebung der  
Sünde / nach Christi böfel vnd inhalt der heil-  
gen Schrifft geprediget / Die misbrench inn der  
Kirchen angezeigt / vnd fur Abgötterey gewar-  
net / Wie Gott anzuruffen / vnd was Christi-  
che Freiheit sey / dafür alle Welt hette nidder  
knien / vnd Gott dancken sollen / Aber die Papi-  
sten haben ihn dagegen / auff's enfferste gehasset  
vnd verfolget / seine lere ketzerey gescholten / vnd  
als trage die erde keinen ergern menschen / Das  
ist ihr danck / fur Gottes wolthat.

Wir aber / die wir seiner lere anhengig / vnd  
vns Euangelisch schelten lassen / halten vns /  
das auch wol besser töchte / Wir wissen den  
weg des Derrn / denn er hat ihn vns durch sein  
wort offenbart / aber wir wandeln nach vnserm  
gefallen / In der Jugent sibet man weder scham  
noch zucht / so achten sie keines gehorsams / In  
alten ist's eitel geitz / wucher vnd vntrew /  
Niemand wandelt mehr erbar vnd anffrich-  
tig /

tig / lest ihm auch niemand an seinem beruff  
genügen / Es gehet allenthalben / wie der Pro-  
phet Dosea klaget / das zu seinen zeiten fur der  
Babilonischen gefengnis gangen ist / da er am  
4. Cap. sagt / Höret ihr kinder Israel des Herr  
ren wort / denn der Herr hat vrsach zu schelten  
die im Lande wonen / Denn es ist keine Trew /  
keine Liebe / kein Wort Gottes im Lande /  
Sondern Gottes lestern / Liegen / Morden /  
Stelen vnd Ehebrechen / hat vberhand geno-  
men / vnd kumpt eine blutschuld nach der an-  
dern / darumb wird das Land jemerlich stehen /  
vnd allen Einwonern vbel gehen / Denn es wer-  
den auch die Thier auff dem Felde / vnd die Vö-  
gel vnter dem Dimel / vnd die Fische im Meer /  
weggerafft werden.

Vnd hie were es zeit Busse thun vnd weis-  
nen / nicht vber den seligen Man / der nu allem  
vbel entgangen / vnd inn Gott seliglich ruhet /  
Sondern das wir mit vnsern sünden Gott rei-  
tzen / vnd zur straff mehr denn schrittes eilen /  
Aber ich besorge / es werd des Propheten weis-  
sagung an vielen war / vnd erfüllet werden / die  
sich darumb nichts annemen / sondern wie er sa-  
get / Der gerechte kumpt vmb / vnd niemand ist /  
der es zu hertzen neme / vnd heilige Leute werden  
auffgerafft / vñ niemand achtet drauff / denn die  
gerechten werdē weggerafft fur dem vnglück vñ  
das

Das ist zubeforgen / das es auff viel Verrechter  
vnd Unbusfertiger Köpffe / fallen wird / da er  
nu hinweg ist / vnd den jamer nicht sehend darff.

Darumb so seit vermanet / ihr lieben Chri-  
sten / vnd wem es bis anher nicht zu hertzen gangen /  
der schick sich noch inn die sache / höre vnd  
habacht auff Gottes wort / thu busse / vnd beke-  
re sich / ein jder von seinem bösen wege / so wil  
der Herr auch noch umbkeren / sagt der Pro-  
phet / vnd sol ihn gerewen / der Straff / so er  
vber vns beschlossen hat / Oder aber / so es die  
Gottlosen je nicht anders haben wöllen / so  
wird doch der gerechte errettet / wo nicht hie zeit-  
lich / doch dorte ewiglich / Vnd wo die Gottlo-  
sen mit zeitlicher vnd ewiger pein gestrafft wer-  
den / wird vns / die wir ein Busfertigkeit leben für-  
ren / die zeitliche straff ein fürderung sein zum  
ewigen leben. Es wird auch noch der Sone  
Gottes / in solcher straff / seine Kirche erhalten /  
vnd werden glenbigen vberbleiben / vnd errettet  
werden / Aber die vrsach seines tods / ist vnser  
Sündlich leben / das Gott fur hat / zu straffen.

Nu wöllen wir fur das vierde vnd letzte auch  
hören / was nu jtz dieses Mannes thun vnd  
wesen sey / Nach dem leibe / wie wir ihn da noch  
fur vnsern augen auff der Bare sehen / schles-  
set er / vnd freilich einem senfftern schlaff / denn  
er /

er / die zeit seines lebens je geschlaffen / vñ wird  
solcher schlaff weren bis an Jüngsten tag / Da  
er nu aller sorge / mühe / arbeit vñ fahr entbrö-  
chen / weder Bapst noch Cardinal / Welt noch  
Teuffel fürchten darff. D wie hat der Bapst  
samt den seinen / das frome trewe vnd Gott-  
fürchtige hertz gequelet / vnd gemartert / mit  
seinem Gottlosen wesen / Das er gesehen /  
Kirchen vnd allen Gottesdienst vntergedruckt  
vnd alles mit eittel Abgötterey / vnd hellischem  
Sodoma erfüllet / Vnd dazu müssen leiden das  
er verband / vnd an seinem Bilde verbrand wor-  
den ist zu Rom / welches sie an seinem Leibe viel  
lieder gethan hetten / Aber Gott hat ihn gne-  
diglich aus ihrem blutgirigen Rachen gerissen /  
vnd zu seliger ruge gelegt / Werden ihn wol vn-  
gebissen lassen / Denn er ist nu wie der Prophet  
sagt / zum friede komen / vnd ruget in seiner ka-  
mer.

Vnd ist je tröstlich allen Gienbigen / das  
der heilige Geist / den Tod / der Gerechten / das  
ist / der gienbigen / einen friede vnd ihre schlaff-  
kamer nennet / Wie Gott eben in dem Prophe-  
ten am 26. cap. auch saget / Gehe hin mein volck  
inn eine kamer / vnd schleus die Thür nach dir  
zu / Verbirgedich ein klein augenblick / bis der  
zorn fur vber gehe. Menschliche vernunft ent-  
setzt sich darumb vor dem Tod / das sie ihn an-  
sichet / als sey es eitel trübnis vnd vnruhe /

J Aber



BLB

Badische Landesbibliothek  
Karlsruhe

Aber die Schrift nennet ihn einen schlaff / vñ  
dazu einen fridesamen schlaff der Gleubigen / in  
ihren kamern / Sie schlaffen ja zuvor auch / das  
ist / Gott gibt ihn bisweilen einen trost / das sie  
des Satans vnd Welt zornigen has / verachte  
können / Aber / bey leben / schlaffen sie inn einer  
frembden kamer / in einer frembden Herberge /  
da man auffwachen / vnd widerumb / trübsal  
vnd verfolgung leiden mus / wie wir an dem tew  
ern Man / offft auch alhie zu Lifsleben / kurtz  
für seinem seligen ende gesehen / das er freud ge  
habt / aber er ist noch in einer frembdē herberge  
gewest / darumb hat sie nicht lange weren müß  
sen / das er auch auff einen abend / ein mal mit  
threnen klaget / Er hette sein hertz mit freudē zu  
Gott erhaben / vnd zum Fenster hinaus in ange  
betet / aber er sehe den Teuffel auff dem Körtka  
sten sitzen / vñ das maul gegen ihm auffsperrē /  
der ihn in allen seinen handlungen hindere /  
Aber Gott würd noch stercker sein / den der Sa  
tan / das wuste er vorwar.

Da hatte ihm Gott ruhe verlihen / das ist /  
trost des hertzens geben / er rugete aber noch  
nicht inn seiner kamer / darumb musste er durch  
den Satan aus seiner ruge verstört / vnd auff  
geweckt werden / Aber nu hat er frid vñ ruge in  
seiner kamer / wird ihn hinfurt nicht mehr aus  
seiner ruge bringen / wie denn alle Gleubige /  
so

so von Adams zeit her / in Christo ein geschla-  
ffen / sanfft vnd stille rugen / vnd wie der Psalm  
saget / Es brennet sie des tages keine Sonne /  
noch drücket des nachts die kelde / Vnd ob er vñ  
wir alle schon von wüermen verzeret / vñ wie wir  
von Erde geschaffen / wider zur Erde werden  
müssen / Doch so gehets zu / on alles fülen / one  
schmertzten / vnd one wehe / vnd ist wie S. Paul  
saget 1. Cor. 15. Es wird geseet verweslich / vnd  
wird aufferstehn vnuerweslich / Es wird geseet  
in vnehre / vnd wird aufferstehn in herrligkeit /  
Es wird geseet in schwachheit / vnd wird auffers-  
stehn in krafft / Es wird geseet ein natürlicher  
leib / vnd wird aufferstehn / ein geistlicher leib.

Vnd das sey nu gesagt / von dem wesen / so  
vnser lieber Herr vnd Vater nu hat / nach sei-  
nem seligen abschied / so viel den leib belangt /  
Den wir / sampt den vnsern / vnd aller glenbi-  
gen Leibe am Jüngsten tage werden sehen auf-  
ferstehen / gleichformig dem Leib / welchen  
Christus am heiligen Ostertag herfur bra-  
chte / Schöner denn die liebe Sonne / wenn  
sie am hellen Dimel auffgehet / Schneller  
vnd behender / denn sie leufft / vnd trefftiger  
denn alle Creaturn / das als denn / den Leib  
niemand mehr anfechten / betrüben / noch  
tödtet wird / Sondern / wie dem Sone Got-  
tes / alle ding / vnter seine füsse geworffen /

J ij Also

Also wird auch ihm vnd vns / Tod / Teuffel vñ  
Welle / sampt allen Creaturn / vnterworffen  
sein / Vnd inn den worten / sollen wir vns vber  
dieser seligen Leichen / vnd wider vnsern Tod  
trösten.

So viel aber den Geist / oder die Seele thut  
belangen / so hat es die meinung nicht / wie etz-  
liche Schwermgeister furgeben / Als solle der  
Geist oder Seele des menschen auch schlaffen /  
bis zum Jüngsten tage. Dat doch die Seele  
nicht geschlaffen / weil sie im leibe / wie in einem  
Kercker verschlossen / vnd wie das Buch der  
Weisheit sagt / beschwert gewest ist / Solte sie  
dest nu schlaffen / weil sie aus dem Kercker erlö-  
set? Es ist der Seelen art vnd natur nicht / von  
Gott zu schlaffen geschaffen / Sondern / das  
sie allezeit lebet / wachet vnd wircket / Weñ der  
Leib schon schlefft / so wachet aber die Seele /  
wie wir denn an den natürlichen trewmē / vnd  
sonst viel erfahrung haben. Darumb so ifts ein  
irthumb / da etzliche furgeben / die Seele schla-  
ffe bis zum Jüngsten tage / gleich wie der Leib /  
Sondern das ist gewis / das sie wacht vñ lebt /  
Gleich wie sie gelebt / ehe denn sie zum leib ko-  
men ist / vnd den selbigen erst lebend gemacht  
hat / Also lebt sie nach abscheidung vom Leib /  
vñ wird durch Gottes gewaltige hand / den sel-  
bigen lebend machē / weñ sie an dem grossen Ta-  
ge des Herrn / zum leibe widerumb wird komē.  
Vnd

Vnd hiemit stimmet auch die Delliger  
Schrift/ Luce 17. Cap. da Abraham redet mit  
dem Reichen Man/ so inn der Welle begraben/  
vnd Lazarum in seinem Schos sitzen sahe. Das  
vermag ein Schlassender oder Todter nicht zu  
thun. Apocalip. 6. Capit. schreien die seelen/  
der / so erwürget waren vmb Gottes worts wil-  
len / Da wird aber angezeigt / das sie wachen  
vnd leben. So saget Christus/ Gott sey ein Gott  
der lebendigen / Gott sey Abrahams / Isaacs  
vnd Jacobs Gott / darumb müssen sie leben. Nu  
waren sie nach dem leib / dazumal / langs ver-  
storben / Derhalben so leben sie nach der seele /  
Vnd leben gewislich bey Gott / vnd vnserm  
Herrn Christo.

Denn also stehet geschrieben / Eccle. 12 /  
Der Staub mus widder zu der Erden komen/  
wie er gewesen ist / vnd der Geist wider zu Gott/  
der ihn gegeben hat. So saget Christus zum  
Schecher / Wente soltu mit mir im Paradis  
sein. Vnd S. Paul / Ich beger zu sterben / vnd  
bey Christo zu sein. Item wir leben oder sterben/  
so sind wir des Herrn / Rom. 14. Vnd Apoca.  
6. sihet Johannes vnter dem Altar die See-  
len / dere die erwüget waren / vmb des Wort  
Gottes willen / das sie hatten / vnd sie schrien  
mit grosser stim / vnd sprachen / Herr / du heiliger  
vnd warhafftiger / wie lange richtest du / vnd re-  
chest nicht vnser blut / an denen / die aufferden

J iij won



wonen: Vnd ihnen wurden gegeben / einem jglichen ein weis Kleid / vnd ward zu ihnen gesaget / das sie rugeten noch ein kleine zeit / bis das volgend dazu kemen / ire Mithnechte vnd Brüdere / die auch sollen ertödtet werden / gleich wie sie.

Aus diesem Spruch (wie auch aus den andern) ist klar / das der verstorbenen Seelen leben vnd wachen / Sonst würden sie nicht mit grosser stimme schreien / vnd dazu bey Gott vnd vnserm Herrn Ihesu Christo / welcher der Altar ist. Aus welchem folget das auch / dieweil dieser Diener Gottes / mit anruffung vnd bekentnis des Namens Christi verschieden / nach seinem Geist bey Gott / vnd seinem Sone sein mus / vnd hat sein wesen vnter den lieben Engeln / vnd aufserwelten Gottes. Wie er aber fürnemlich / bey Mose / Esaia / den Propheten / vnd Aposteln / Sonderlich aber bey S. Paulo gehalten sey / welcher Bücher vertünckelt im fensternis gelegen sein / bis das er sie durch den Geist Lie / mit predigen vnd schreiben / widerumb ans liecht / vnd rechten brauch der Kirchen gebracht hat / Vnd das Lamb Gottes mitten vnter ihn / dem sie nach folgen / wo es hingehet / welches sie bey leben erkand vnd bekand gemacht haben / Das wollen wir auch erfahren vnd sehen / wenn vns der barmhertzige Gott / ein Vater vnser Herr Ihesu Christi / auch seliglich hernach wird foddern.

Itzund


Itzund / bieweil wir gehort / wer Doctor  
Martinus Luther gewesen / Nemlich ein rechter  
Elias vnd Johannes Baptista zu vnsern zeiten /  
wie Christlich er im Herrn eingeschlaffen /  
vnd warumb er eben itzund dieser zeit / von Gots  
aus dieser Welt abgefoddert / auch / was nu  
mehr sein thun vnd wesen sey / Wollen wir ihn  
dem **DEXXI** befehlen / Vnd bitten / Gots  
wolte an seine stat widerumb einen andern Pro-  
pheten seiner Kirchen senden / vnd nach diesem  
Elia einen Elisam geben / der seines Geistes zwof-  
feltig so viel hab / vnd dem Römischen Babi-  
lon zwifaltiges vergelte / denn bis her gesehe-  
hen / Auch das wir durch den Heiligen Geist  
erleucht / vns durch seine Bücher inn die heil-  
lige Schrifft füren lassen / vnd in rech-  
tem glauben vnd leben / vnser letztes  
stündlin auch seliglich  
beschliessen.  
**AMEN / AMEN /**  
**AMEN.**

Gedruckt zu Wittenberg / durch  
Georgen Rhaw.



**BLB**

Badische Landesbibliothek  
Karlsruhe



Q 1774 20



